

明史

三四



明史卷一百十七

列傳第五

總裁官總理事務 經筵講官保兼太子太保和殿大學士兼管部戶部尚書事加六級張廷華奉

敕修

諸王二

太祖諸子二

蜀王椿

湘王柏

代王桂

襄垣王遜燁成鎮

靈邱王遜炗廷鄭

肅王模

遼王植

慶王櫟

寧王權

蜀獻王椿太祖第十一子洪武十一年封十八年命駐

鳳陽二十三年就藩成都性孝友慈祥博綜典籍容止都雅帝嘗呼爲蜀秀才在鳳陽時闢西堂延李叔荆蘓伯衡商榷文史旣至蜀聘方孝孺爲世子傅表其居曰正學以風蜀人詣講郡學知諸博士貧分祿餼之月一石後爲定制造安車賜長史陳南賓聞義烏王紳賢聘至待以客禮紳父禕死雲南往求遺骸資給之時諸王皆備邊練士卒椿獨以禮教守西陲番人入寇燒黑崖關椿請於朝遣都指揮瞿能隨涼國公藍玉出大渡河邀擊之自是番人讐伏前代兩川之亂皆因內地不逞者鉤致爲患有司私市蠻中物或需索啓爭端椿請繪

錦香扇之屬從王邸定爲常貢此外悉免宣索蜀人由
此安業日益殷富川中二百年不被兵革椿力也成祖
卽位來朝賜予倍諸藩谷王穗椿母弟也圖不軌椿子
悅燭獲咎於椿走穗所穗稱爲故建文君以詭衆永樂
十四年椿暴其罪帝報曰王此舉周公安王室之心也
入朝資金銀繒綵鉅萬二十一年薨世子悅嫌先卒孫
靖王友埉嗣初華陽王悅燿謀奪嫡椿覺之會有他過
杖之百將械於朝友埉爲力請得釋椿之薨友埉方在
京師悅燿竊王帑友埉歸不問悅燿更誣奏友埉怨誹
成祖召入訊之會崩仁宗察其誣命歸藩召悅燿悅燿

猶執奏仁宗抵其章於地遷之武岡復遷澧州宣德五年總兵官陳懷奏都司私遺蜀邸砲用以警夜非制詔逮都司首領官明年獻還二護衛從之是年薨妃李侍姬黃皆自經以殉無子弟僖王友璫由羅江王嗣九年薨獻王第五子和王悅熒由保寧王嗣天順五年薨繼妃徐氏年二十六不食死諡靜節子定王友垓嗣七年薨子懷王申鉉嗣成化七年薨弟惠王申鑿嗣弘治六年薨子昭王賓瀚嗣正德三年薨子成王讓栩嗣自椿以下四世七王幾百五十年皆檢飭守禮法好學能文孝宗恒稱蜀多賢王舉獻王家範爲諸宗法讓栩尤賢

明喜儒雅不邇聲伎創義學修水利振災卹荒嘉靖十五年巡撫都御史吳山巡按御史金粲以聞賜敕嘉獎署坊表曰忠孝賢良二十年建太廟獻黃金六十斤白金六百斤酬以玉帶幣帛二十六年薨子康王承爚嗣三十七年薨子端王宣圻嗣萬曆四十年薨子恭王奉銓嗣四十三年薨子至澍嗣崇禎末京師陷蜀尚無恙未幾張獻忠陷成都合宗被害至澍率妃妾投於井湘獻王柏太祖第十二子洪武十一年封十八年就藩荊州性嗜學讀書每至夜分開景元閣招納俊乂日事校讐志在經國喜談兵膂力過人善弓矢刀槊馳馬若

飛三十年五月同楚王楨討古州蠻每出入縹囊載書以隨遇山水勝境輒徘徊終日尤善道家言自號紫虛子建文初有告柏反者帝遣使卽訊柏懼無以自明闔宮焚死諡曰戾王無子封除永樂初改諡獻置祠官守其園

代簡王桂太祖第十三子洪武十一年封豫王二十五年改封代是年就藩大同糧餉艱遠令立衛屯田以省轉運明年詔帥護衛兵出塞受晉王節制桂性暴建文時以罪廢爲庶人成祖卽位復爵永樂元年正月還舊封十一月賜璽書曰聞弟縱戮取財國人甚苦告者數

矣且王獨不記建文時耶尋命有司自今王府不得擅役軍民斂財物聽者治之已復有告其不軌者賜敕列其三十二罪召入朝不至再召至中途遣還革其三護衛及官屬王妃中山王徐達女仁孝文皇后妹也驕妒嘗漆桂二侍女爲癩事聞帝以中山王故不罪桂移怒世子遜熾出其母子居外舍桂已老尚時時與諸子遜料遜熾窄衣禿帽遊行市中袖鐮斧傷人王府教授楊普上言遜料狎軍人武亮與博戲致箠殺軍人朝廷杖治亮降敕責戒稍斂戢十六年四月復護衛及官屬正統十一年桂薨世子遜熾先卒孫隱王仕壘嗣景泰中

嘗上言總兵官郭登守城功朝廷爲勞登天順七年薨
子惠王成鍊嗣弘治二年薨子聰沫先封武邑王以肆
酒革爵已居惠王喪益淫酗廢爲庶人遷太原久之惠
王妃爲疏理復封武邑王卒子懿王俊杖襲封代王嘉
靖三年大同軍叛圍王宮俊杖走免事平賜書慰問六
年薨子昭王充燿嗣十二年大同軍又叛充燿走宣府
再賜慰問事平返國奏亂賊旣除軍民交困乞遣大臣
振撫詔允行二十四年和川奉國將軍充灼坐罪奪祿
怨充燿不爲解乃與襄垣中尉充燾謀引敵入大同殺
王會應州人羅廷璽等以白蓮教惑衆見充灼爲妖言

因畫策約奉小王子入塞藉其兵攻鴈門取平陽立充
灼爲主事定卽計殺小王子充灼然之先遣人陰持火
箭焚大同草場五六所而令通蒙古語者衛奉闌出邊
爲總兵周尚文邏卒所獲竝得其所獻小王子表鞫實
以聞逮充灼等至京賜死焚其屍王府長史等官皆逮
治總督侍郎翁萬達疏言大同狹瘠祿餉不支代宗日
繁行衆聚而貧且地近邊易生反側請量移和川昌化
諸郡王於山陝隙地詔改遷於山西先是景泰間昌化
王仕潭乞移封景帝不許至是乃遷代宗自簡至懿封
郡王者凡二十有三而外徙者十王二十六年充耀薨

子恭王廷埼嗣饒陽王充蒞數以事侵廷埼恐得罪乃以陳邊事爲名三十一年奏鎮巡官之罪世宗爲黜巡撫都御史何思逮總兵官徐仁等充蒞益驕遂與廷埼互訐前後勘官莫能判巡撫都御史侯鉞奏奪其祿充蒞怒不承三十三年詔遣司禮少監王臻卽訊充蒞乃伏下法司錮高牆萬曆元年廷埼薨子定王鼎鉉嗣三十二年薨無子弟新寧王鼎鈞嗣薨子康王鼎渭嗣崇禎二年薨再傳至孫傳濟崇禎十七年三月李自成入大同闔門遇害襄垣王遜燁簡王第五子分封蒲州諸王就藩後非請命不得歲時定省遜燁念大同不置作

思親篇詞甚悲切其後宗人聰灋聰洙俊欒俊權俊噪
俊杓俊噤充焯皆嫻於文章俊噤字若訥尤博學有盛
名不慕榮利姊陵川縣君適裴禹卿地震城崩禹卿死
縣君以首觸棺嘔血卒年二十有一詔諡貞節靈邱王
遜炷簡王第六子宣宗時封好學工詩尤善醫嘗施藥
治瘟疫全活無算子仕塲孫成釵曾孫聰漏三王皆以
孝旌聰漏子俊格能文善書嘉靖時獻皇儲明堂二頌
興獻帝后挽歌賜金帛聰漏嘗乞封其孫廷址爲會長
孫禮官奏無故事帝以王壽考特許之已而復封廷址
子鼎鏞爲元長孫聰漏薨年八十三鼎鏞襲高祖爵聰

漏之從父成鑑亦有孝行聰漏聞於朝賜金幣獎諭詔
禮官自今宗室中孝行卓異如成鑑者撫按疏聞又成
鎮者隰川王諸孫父仕塏坐罪幽鳳陽病死成鎮微服
走鳳陽視喪上疏自劾越禁乞負父骨歸葬澤州卽不
得願爲庶人止墓側歲時省視詔許歸葬弟成鏐亦好
學有志槩嘉靖十三年上言雲中叛卒之變幸獲銷弭
究其釁端實貪酷官吏激成之臣慮天下之禍隱於民
心異日不獨雲中而已指陳切直帝下廷臣飭行時以
其兄弟爲二難焉萬曆二十年西夏弗寧山陰王俊柵
奏詩八章寓規諷之旨代處塞上諸宗洊經禍亂其言

皆憂深思遠有中朝士大夫所不及者廷鄣代府宗室也崇禎中爲鞏昌府通判署秦州事有廉直聲十六年冬賊陷秦州被執使之跪叱曰我天朝宗姓頭可斷膝不可屈賊欲活之大呼曰今日惟求一死坐自若遂見害

肅莊王模太祖第十四子洪武十一年封漢王二十四年命偕衛谷慶寧岷五王練兵臨清明年改封肅又明年詔之國以陝西各衛兵未集命駐平涼二十八年始就藩甘州詔王理陝西行都司甘州五衛軍務三十年令督軍屯糧遇征伐以長興侯耿炳文從建文元年乞

內徙遂移蘭州永樂六年以捶殺衛卒三人及受哈密進馬逮其長史官屬已又聽百戶劉成言罪平涼衛軍敕械成等京師十七年薨子康王瞻焰嗣宣德七年上二護衛府中被盜爲榜募告捕者御史言非制罪其長史楊威瞻焰又請加歲祿敕曰洪武永樂間歲祿不過五百石莊王不言者以朝廷念遠地轉輸難故也仁考卽位加五百石矣朕守祖制不敢違正統元年上言甘州舊邸改都司而先王墳園尚在乞禁近邸樵採從之天順三年上馬五百匹備邊予直不受帝强予之八年薨子簡王祿埤嗣成化十五年薨子恭王貢鏊嗣嘉靖

十五年薨世子眞淤長孫弼桓皆早卒次孫定王弼枕
嗣四十一年薨子縉炯先卒孫懷王紳堵嗣踰二年薨
無子靖王第四子弼柿子輔國將軍縉燾以屬近宜嗣
禮官言縉燾懷王從父不宜襲詔以本職理府事上冊
寶罷諸官屬穆宗卽位定王妃吳氏及延長王眞澆等
先後上言聖祖刈羣雄定天下報功之典有隆無替臣
祖莊王受封邊境操練征戍屏衛天家不幸太宗中絕
反拘於昭穆之次不及勲武繼絕之典非所以崇本支
厚藩衛也下部議議以郡王理藩政帝不許隆慶五年
特命縉燾嗣肅王設官屬之半萬曆十六年薨諡曰懿

明史卷一百一十七 列傳 八
子憲王紳堯嗣四十六年薨子識鉉嗣崇禎十六年冬
李自成破蘭州被執宗人皆死

遼簡王植太祖第十五子洪武十一年封衛王二十五
年改封遼明年就藩廣寧以宮室未成暫駐大凌河北
樹柵爲營帝命武定侯郭英爲築城郭宮室英王妃父
也督工峻急會高麗自國中至鴨綠江皆積粟帝慮其
有陰謀而役作軍士艱苦令輟役至三十年始命都督
楊文督遼東諸衛士繕治之增其雉堞以嚴邊衛復圖
西北沿邊要害示植與寧王權諭之曰自東勝以西至
寧夏河西察罕腦兒東勝以東至大同宣府開平又東

南至大寧又東至遼東抵鴨綠江北至大漠又自鴈門關外西抵黃河渡河至察罕腦兒又東至紫荊關又東至居庸關及古北口又東至山海衛凡軍民屯種地毋縱畜牧其荒曠地及山場聽諸王駙馬收放樵採東西往來營駐因以時練兵防寇違者論之植在邊習軍旅屢樹軍功建文中靖難兵起召植及寧王權還京植渡海歸朝改封荊州永樂元年入朝帝以植初貳於己嫌之十年削其護衛留軍校廚役三百人備使令二十二年薨子長陽王貴烺嗣初植庶子遠安王貴燮巴東王貴煊嘗告其父有異謀及父死又不奔喪仁宗卽位皆

廢爲庶人正統元年府僚乞加王祿敕曰簡王得罪朝廷成祖特厚待仁宗朝加祿得支二千石宣宗又給旗軍三百人親親已至王素乖禮度府臣不匡正顧爲王請乎不許三年巡撫侍郎吳政奏王不友諸弟待庶母寡恩捶死長史杜述居國多過召訊京師盡得其淫穢黷倫兇暴諸不法事明年四月廢爲庶人守簡王園弟肅王貴授嗣成化七年薨子靖王豪盛嗣十四年薨子惠王恩鑑嗣弘治五年松滋王府諸宗人恩鑑等闖入荊州府支歲祿恩鑑禁之皆怨已儀賓袁鏞復誘恩鑑等招羣小奪軍民商賈利恩鑑發其事恩鑑等愈怨謀

殺王朝廷遣官按實幽恩鑑等鳳陽謫戍其黨有差恩
鑑陰使送者刑梏之斃八十餘人不數日世子暴卒八
年恩鑑疽發背薨子恭王寵授嗣與弟光澤王寵瀼友
愛飲食服御必俱寵瀼有令德寵瀼有事必咨之後行
正德十六年薨子莊王致格嗣病不視事妃毛氏明書
史沉毅有斷中外肅然賢聲聞天下嘉靖十六年致格
薨子憲爚嗣以奉道爲世宗所寵賜號清微忠教真人
予金印隆慶元年御史陳省劾憲爚諸不法事詔奪真
人號及印明年巡按御史邵光先復劾其大罪十三命
刑部侍郎洪朝選往勘具得其淫虐僭擬諸罪狀帝以

憲燦宜誅念宗親免死廢爲庶人錮高牆初副使施篤臣憾憲燦甚朝選至湖廣篤臣詐爲憲燦書餽朝選因刼持之憲燦建白蠹曰訟寃之蠹篤臣驚曰王反矣使卒五百圍王宮朝選還朝實王罪不言王反大學士張居正家荊州故與憲燦有隙嫌朝選不坐憲燦反久之屬巡撫都御史勞堪羅織朝選死獄中其後居正死憲燦訟寃籍居正家而篤臣亦死遼國除諸宗隸楚藩以廣元王術堦爲宗理

慶靖王櫛太祖第十六子洪武二十四年封二十六年就藩寧夏以餉未敷令駐慶陽北古韋州城就延安綏

寧租賦二十八年詔王理慶陽寧夏延安綏德諸衛軍務三十年始建邸王好學有文忠孝出天性成祖善之令歲一至韋州度夏宣德初言寧夏卑濕水泉惡乞仍居韋不許令歲一往來如成祖時正統初寧夏總兵官史昭奏王沮邊務占靈州草場畜牧遣使由綏德草地往還煽惑土民章未下或告王閱兵造戎器購天文書橐疑皆昭爲之三年上書請徙國避昭英宗不可貽書慰諭其年薨子康王秩烽嗣景泰元年以寧夏屢被兵乞徙內地不許成化五年薨子懷王遂雙嗣十五年薨弟莊王遂塤嗣弘治四年薨子恭王寘鏊嗣十一年薨

子定王台法嗣正德五年安化王寘鐸反台法稽首行君臣禮詔削護衛革祿三之一戍其承奉長史嘉靖三年台法賄鎮守太監李昕總兵官种勛求爲奏請復祿昕勛不納台法銜之會寧夏衛指揮楊欽等得罪於巡撫都御史張璿謀藉王殺璿及勛事覺下都司按察司按治欽等誣台法不軌璿以聞帝使太監扶安副都御史王時中等復按上言台法他罪有之無謀不軌事詔廷臣定議坐前屈事寘鐸蒙恩不悛煽構羣小謀害守臣廢爲庶人留邸歲與米三百石以其叔父鞏昌王寘鉶攝府事寘鉶裁慶邸宮妃薪米取邸中金帛萬計台

泐子竊櫝幼失愛於父逃寘鉏所寘鉏造台泐謀逆謠
語使寺人誘竊櫝吟誦圖陷台泐自立懷王妃王氏奏
寘鉏裁減衣食至不能自存豐林王台瀚亦欲陷寘鉏
遂發其瀆亂人倫諸罪驗實廢爲庶人幽高牆廷議謂
台泐父子乖離徙台泐西安而封竊櫝世子視府事十
一年十月也十五年以兩宮徽號恩復台泐冠帶薨竊
櫝先卒弟惠王竊枋嗣好學樂善以禮飭諸宗世宗賜
之敕建坊表之寧夏築邊牆竊枋出銀米佐工萬曆二
年薨子端王倪燾嗣十六年薨子憲王伸域嗣十九年
薨明年寧夏賊哱拜反王妃方氏匿其子帥鉉地窖中

自經死時壽陽嗣王倪爌呼拜脇降之不屈爲所囚鎮
原王伸埶理府事謀襲賊弗克府中人皆被殺賊平御
史劉芳譽言諸宗死節者俱應卹錄方妃宜建祠旌表
詔從之給銀一萬五千兩分振諸宗人帥錚嗣薨子倬
淮嗣崇禎十六年流賊破寧夏被執安塞王秩炅靖王
季子也十二而孤母位氏誨之性通敏過目不忘善古
文遇縉紳學士質難辨惑移日不倦所著有隨筆二十
卷庶人寅鐸祖秩炅靖王第四子也封安化王父遂墁
鎮國將軍以寅鐸襲王爵性狂誕相者言其當大貴巫
王九兒教鸚鵡妄言禍福寅鐸遂覬望非分寧夏指揮

周昂千戶何錦丁廣衛諸學生孫景文孟彬史連輩皆往來寘鐠所正德五年帝遣大理少卿周東度寧夏屯田東希劉瑾意以五十畝爲一頃又畝斂銀爲瑾賄敲扑慘酷戍將衛卒皆憤怨而巡撫都御史安惟學數杖辱將士妻將士銜刺骨寘鐠知衆怒令景文飲諸武臣酒以言激之諸武臣多願從寘鐠者又令人結平鹵城戍將及素所厚張欽等會有邊警叅將仇鉞副總兵楊英帥兵出防禦總兵官姜漢簡銳卒六十人爲牙兵令周昂領之遂與何錦定約四月五日寘鐠設宴邀撫鎮官飲於第惟學東不至錦昂帥牙兵直入殺姜漢及太

監李增鄧廣於坐分遣卒殺惟學東及都指揮楊忠於公署遂焚官府釋囚繫撤黃河渡船於西岸以絕渡者遣人招楊英仇鉞皆佯許之英率衆保王宏堡衆潰英奔靈州鉞引還寘鐠奪其軍出金帛犒將士僞署何錦大將軍周昂丁廣副將軍張欽先鋒魏鎮楊泰等總兵都護令孫景文作檄以討劉瑾爲名陝西總兵官曹雄聞變遣指揮黃正駐靈州檄楊英督靈州兵防黃河都指揮韓斌總兵官侯勲叅將時源各以兵會英密使蒼頭報仇鉞爲內應令史墉浮渡奪西岸船營河東焚大小二壩草寘鐠懼令錦等出禦獨留昂守城使使召鉞

鉞稱病昂來問疾鉞刺昂死令親兵馳寘鐸第擊殺景文連等十餘人遂擒寘鐸迎英衆入寘鐸反十有八日而擒錦廣泰欽先後皆獲械送伏誅寘鐸賜死諸子弟皆論死有孫鼎材逃出削髮爲僧居永寧山中未幾爲土僧所凌詣官言狀傳至京安化宮人左寶瓶在浣衣局使驗之咤曰此鼎材殿下也帝念其自歸免死安置鳳陽

寧獻王權太祖第十七子洪武二十四年封踰二年就藩大寧大寧在喜峯口外古會州地東連遼左西接宣府爲巨鎮帶甲八萬革車六千所屬朶顏三衛騎兵皆

驍勇善戰權數會諸王出塞以善謀稱燕王初起兵與諸將議曰曩余巡塞上見大寧諸軍慄悍吾得大寧斷遼東取邊騎助戰大事濟矣建文元年朝議恐權與燕合使人召權權不至坐削三護衛其年九月江陰侯吳高攻永平燕王往救高退燕王遂自劉家口間道趨大寧詭言窮蹙來求救權邀燕王單騎入城執手大慟具言不得已起兵故求代草表謝罪居數日欵洽不爲備北平銳卒伏城外吏士稍稍入城陰結三衛部長及諸戍卒燕王辭去權祖之郊伏兵起擁權行三衛曠騎及諸戍卒一呼畢集守將朱鑑不能禦戰歿王府妃妾世

子皆隨入松亭關歸北平大寧城爲空權入燕軍時時爲燕王草檄燕王謂權事成當中分天下比卽位王乞改南土請蘇州曰畿內也請錢塘曰皇考以予五弟竟不果建文無道以王其弟亦不克享建寧重慶荊州東昌皆善地惟弟擇焉永樂元年二月改封南昌帝親製詩送之詔卽布政司爲邸餽餼規制無所更已而人告權巫蠱誹謗事密探無驗得已自是日韜晦構精廬一區鼓琴讀書其間終成祖世得無患仁宗時法禁稍解乃上書言南昌非其封國帝答書曰南昌叔父受之皇考已二十餘年非封國而何宣德三年請乞近郭灌城

鄉土田明年又論宗室不應定品級帝怒頗有所詰責
權上書謝過時年已老有司多齟齬以示威重權日與
文學士相往還託志狎舉自號臞仙嘗奉敕輯通鑑博
論二卷又作家訓六篇寧國儀範七十四章漢唐祕史
二卷史斷一卷文譜八卷詩譜一卷其他註纂數十種
正統十三年薨世子盤斌先卒孫靖王奠培嗣奠培善
文辭而性卞急多嫌猜景泰七年弟弋陽王奠璽訐其
反逆巡撫韓雍以聞帝遣官往讞不實時軍民連逮者
六七百人會英宗復辟俱赦釋惟謫戍其教授游堅奠
培由是憾守土官不爲禮布政使崔恭積不平王府事

多持不行奠培遂劾奏恭不法恭與按察使原傑亦奏
奠培私獻惠二王宮人逼內官熊璧自盡按問皆實遂
奪護衛踰三年而奠監以有罪賜死初錦衣衛指揮遂
杲聽訶事者言誣奠監烝母帝令奠培具實以聞復遣
駙馬都尉薛桓與杲按問奠培奏無是事杲按亦無實
帝怒責問杲杲懼仍以爲實遂賜奠監母子自盡焚其
屍是日雷雨大作平地水深數尺衆咸寃之弘治四年
奠培薨子康王覲鈞嗣十年薨子上高王宸濠嗣其母
故娼也始生靖王夢蛇啖其室旦日鴟鳴惡之及長輕
佻無威儀而善以文行自飾術士李自然李日芳妄言

其有異表又謂城東南有天子氣宸濠喜時時誦中朝事聞謗言輒喜或言帝明聖朝廷治卽怒武宗末年無子羣臣數請召宗室子子之宸濠屬疎顧深結左右於帝前稱其賢初宸濠賄劉瑾復所奪護衛瑾誅仍論奪及陸完爲兵部尚書宸濠結嬖人錢寧臧賢爲內主欲奏復大學士費宏執不可諸嬖人乘宏讀廷試卷取中旨行之宸濠益恣擅殺都指揮戴宣逐布政使鄭岳御史范輅幽知府鄭巖宋以方盡奪諸附王府民廬責民間子錢强奪田宅子女養羣盜劫財江湖間有司不敢問日與致仕都御史李士實舉人劉養正等謀不軌副

使胡世寧請朝廷早裁抑之宸濠連奏世寧罪世寧坐
謫戍自是無敢言者正德十二年典儀閭順內官陳宣
劉良間行詣闕上變寧賢等庇之不問宸濠疑出承奉
周儀殺儀家及典仗查武等數百人巡撫都御史孫燧
列其事中道爲所邀不得達宸濠又賄錢寧求取中旨
召其子司香太廟寧言於帝用異色龍牋加金報賜異
色龍牋者故事所賜監國書牋也宸濠大喜列仗受賀
復勒諸生父老奏闕下稱其孝且勤時邊將江彬新得
幸太監張忠附彬欲傾寧賢乘間爲帝言寧賢盛稱寧
王陛下以爲何如帝曰薦文武百執事可任使也薦藩

王何爲者忠曰賢稱寧王孝譏陛下不孝耳稱寧王勤
譏陛下不勤耳帝曰然下詔逐王府人母留闕下是時
宸濠與士實養正日夜謀益遣姦人盧孔章等分布水
陸孔道萬里傳報浹旬往返蹤跡大露朝野皆知其必
反巡撫都御史孫燧七上章言之皆爲所邀沮諸權姦
多得宸濠金錢匿其事不以聞十四年御史蕭淮疏言
宸濠諸罪謂不早制將來之患有不可勝言者疏下內
閣大學士楊廷和謂宜如宣宗處趙府事遣勲戚大臣
宣諭令王自新帝命駙馬都尉崔元都御史顏頤壽太
監賴義持諭往收其護衛令還所奪官民田宸濠聞元

等且至乃定計以巳生辰日宴諸守土官詰旦皆入謝宸濠命甲士環之稱奉太后密旨令起兵入朝孫燧及副使許逵不從縛出斬之執御史王金主事馬思聰金山叅議黃宏許倣廉布政使胡廉叅政陳杲劉棐僉事賴鳳指揮許金白昂等下獄叅政王綸季數僉事潘鵬師夔布政使梁宸按察使楊璋副使唐錦皆從逆以李士實劉養正爲左右丞相王綸爲兵部尚書集兵號十萬命其承奉涂欽與素所蓄羣盜閔念四等畧九江南康破之馳檄指斥朝廷七月壬辰朔宸濠出江西留其黨宜春王拱樛內官萬銳等守城自帥舟師蔽江下攻

安慶汀贛巡撫僉都御史王守仁聞變與吉安知府伍文定等檄諸郡兵先後至乃使奉新知縣劉守緒破其墳廠伏兵戊申直攻南昌辛亥城破拱櫟銳等皆就擒宮人自焚死宸濠方攻安慶不克聞南昌破大恐解圍還守仁逆擊之乙卯遇於黃家渡賊兵乘風進薄氣驕甚文定及指揮余恩佯北誘賊趨利前後不相及知府邢珣徐連戴德孺從後急擊文定還兵乘之賊潰斬溺萬計又別遣知府陳槐林瑊曾璵周朝佐復九江南康明日復戰官兵稍却文定帥士卒殊死鬪擒斬二千餘級宸濠乃退保樵舍明日官軍以火攻之宸濠大敗諸

妃嬪皆赴水死將士焚溺死者三萬餘人宸濠及其世子郡王儀賓竝李士實劉養正涂欽王綸等俱就擒宸濠自舉事至敗蓋四十有三日時帝聞宸濠反下詔暴其罪告宗廟廢爲庶人逮繫尚書陸完嬖人錢寧臧賢等籍其家江彬張忠從與帝親征至良鄉守仁捷奏至檄止之守仁已械繫宸濠等取道浙江帝留南京遣許泰朱暉及內臣張永張忠搜捕江西餘黨民不勝其擾檄守仁還江西守仁至杭州遇張永以俘付之使送行在十五年十二月帝受所獻俘回鑾至通州誅之封除初宸濠謀逆其妃婁氏嘗諫及敗歎曰昔紂用婦言亡

我以不用婦言亡悔何及嘉靖四年弋陽王拱橫等言
獻王惠王四服子孫所共祀非宸濠一人所自出如臣
等皆得甄別守職業如故而二王不獲廟享臣竊痛之
疏三上帝命弋陽王以郡王奉祀樂舞齊郎之屬半給
之寧藩旣廢諸郡王勢頡頏莫能一帝命拱橫攝府事
卒樂安王拱欏攝拱欏奏以建安樂安弋陽三王分治
八支著爲令石城王奠堵惠王第四子性莊毅家法甚
嚴靖王奠培與諸郡王交惡臨川弋陽皆被搆得罪奠
堵獨謹約不能坐以過失子覲鎬孝友有令譽早卒孫
宸浮嗣與母弟宸浦庶兄宸潤皆淫縱殺人弘治十二

年互訐奏宸浮宸浦竝革爲庶人宸灋宸濶奪祿宸灋
遂從宸濠反雷震死嘉靖二十四年復宸浮宸浦冠帶
宸濶子拱挺上書爲父澡雪亦還爵宸灋弟宸浮素方
正宸濠欲屈之不得數使人火其居而諷諸宗資給之
以示惠宸浮辭不受宸濠敗宸浮得免子輔國將軍拱
槩孫奉國將軍多燿曾孫鎮國中尉謀璋三世皆端謹
自好而謀璋尤貫串羣籍通曉朝廷典故諸王子孫好
學敦行自周藩中尉睦樸而外莫及謀璋者萬曆二十
二年廷議增設石城宜春管理命謀璋以中尉理石城
王府事得劾治不法者典藩政三十年宗人咸就約束

暇則閉戶讀書著易象通詩故春秋戴記魯論箋及他書凡百十有二種皆手自繕寫黃汝亨爲進賢令投謁抗禮劇談久之逡巡改席次日北面稱弟子人兩稱之病革猶與諸子說易子八人皆賢而好學從弟謀簪築室龍沙躬耕賦詩以終奉國將軍拱樞瑞昌王奠墀四世孫也父宸渠爲宸濠累逮繫中都兄拱柄請以身代拱樞佐之卒得白嘉靖九年上書請建宗學令宗室設壇墀行耕桑禮謹祀典加意恤刑皆得旨俞允捐田白鹿洞贍學者其後以議禮稱旨拱柄上大禮頌竝賜敕褒諭諸子羣從多知名者多燼多燬以孝友著多燼多

炘以秉禮嚴重稱多燬多燴多炘以善詞賦名而多燴
與從兄多燧獨杜門却掃多購異書校讐以爲樂萬曆
中督撫薦理瑞昌王府事謝不起多燴父拱樛以宸濠
事被逮多燴甫十餘齡哭走軍門乞以身代王守仁見
而異之嘉靖二年疏訟父寃得釋歸復爵時諸郡王統
於弋陽而瑞昌始王不祀多燴自謂小宗宜典宗祏請
於朝特敕許焉乃益祭田修飭家政儼若朝典四子皆
莊謹嗜學奉國將軍多煌惠王第五子弋陽王奠璫五
世孫也孝友嗜學弋陽五傳而絕宗人舉多煌賢能敕
攝府事瑞昌諸宗皆屬焉性廉靜寡欲淑人熊氏早卒

不再娶獨處齋閣者二十六年萬曆四十一年撫按以
行誼聞詔褒之會病卒詔守臣加祭一壇又多烜者亦
奉國將軍穎敏善詩歌嘗變姓名出遊蹤跡遍吳楚晚
病羸猶不廢吟誦卒門人私謚曰清敏先生子謀墀亦
有父風時樂安輔國將軍多痰有詩癖與謀墀等放志
文酒終其世

明史卷一百十七終

明史卷一百十八

列傳第六

總裁官總理事務 經筵講官保兼太子太保保和殿大學士兼管吏部戶部尚書事加六級張廷玉等奉

敕修

諸王三

太祖諸子三

岷王楸

谷王穗

韓王松

藩王模

沁水王埕堦
清源王幼圻

安王楹

唐王桎

三城王芝堦
文城王彌鉗

彌鉗
輔國將軍宇浹

郢王棟

伊王橧

皇子楠

靖江王守謙

興宗諸子

虞王雄英

吳王允燭

衡王允燾

徐王允熿

惠帝諸子

太子文奎

少子文圭

成祖諸子

高煦

趙王高燧

高燾

岷莊王榘太祖第十八子洪武二十四年封國岷州二

十八年以雲南新附宜親王鎮撫改雲南有司請營宮殿帝令暫居樓亭俟民力稍紓後作建文元年西平侯沐晟奏其過廢爲庶人徙漳州永樂初復王與晟交惡帝賜書諭梗而詔戒晟梗沉湎廢禮擅收諸司印信殺戮吏民帝怒奪冊寶尋念王建文中久幽繫復予之而梗不悛六年削其護衛罷官屬洪熙元年徙武岡寄居州治久之始建王邸景泰元年薨子恭王徽燦嗣初世子徽燦宣德初訐其弟鎮南王徽燦誹謗仁廟宣宗疑其詐竝召至京及所連闖豎面質事果誣斬闖豎而遣徽燦等歸徽燦嗣位弟廣通王徽燦有勇力家人段友

洪以技術得寵致仕後軍都事于利賓言徽燄有異相
當主天下遂謀亂作偽敕分遣友洪及蒙能陳添行入
苗中誘諸苗以銀印金幣使發兵攻武岡苗首楊文伯
等不敢受事覺友洪爲徽燄所執都御史李實以聞遣
駙馬都尉焦敬中官李琮徵徽燄入京師湖廣總督王
來總兵官梁瑤復發陽宗王徽燄通謀狀亦徵入皆除
爵幽高牆時景泰二年十月也天順七年徽燄薨子順
王音堃嗣病瘋痺屢年不起次子安昌王膺鋪侍醫藥
晨夕不去左右憲宗聞之賜敕嘉獎成化十六年音堃
薨世子膺鉅居喪飲博無度承奉劉忠禁制之遂殺忠

事聞驗實革冠帶停封居四年乃嗣弘治十三年薨諡
曰簡子靖王彥汰嗣嘉靖四年與弟南安王彥泥訐陰
事彥泥廢爲庶人彥汰亦坐抗制擅權革爵八年令世
子譽榮攝府事譽榮上疏懇辭謂臣坐享尊榮而父困
苦寂寞臣心何安且前曾舉臣弟善化王譽桔廷議以
子無制父理奏寢不行臣亦人子也獨不愧臣弟乎帝
覽疏憐之下部議十二年賜彥汰冠帶理府事十五年
以兩宮徽號恩復王又八年始薨子康王譽榮嗣三十
一年薨子憲王定耀嗣三十四年薨曾孫禋洪天啓二
年嗣崇禎元年薨無子從父企鰲嗣十六年流賊陷武

明史卷一百一十八 列傳 三
岡遇害

谷王橚太祖第十九子洪武二十四年封二十八年三月就藩宣府宣府上谷地故曰谷王燕兵起橚走還京師及燕師渡江橚奉命守金川門登城望見成祖麾蓋開門迎降成祖德之卽位賜橚樂七奏衛士三百賚予甚厚改封長沙增歲祿二千石橚居國橫甚忠誠伯茹瑺過長沙不謁橚橚白之帝瑺得罪死遂益驕肆奪民田侵公稅殺無罪人長史虞廷綱數諫誣廷綱誹謗磔殺之招匿亡命習兵法戰陣造戰艦弓弩器械大創佛寺度僧千人爲咒詛日與都指揮張成宦者吳智劉信

謀呼成師尙父智信國老令公僞引讖書云我高皇帝
十八子與讖合穗行次十九以趙王杞早卒故云謀於
元夕獻燈選壯士教之音樂同入禁中伺隙爲變又致
書蜀王爲隱語欲結蜀爲援蜀王貽書切責不聽已而
蜀王子崇寧王悅燔得罪逃穗所穗因詭衆往年我開
金川門出建文君今在邸中我將爲申大義事發有日
矣蜀王聞之上變告初護衛都督僉事張興見穗爲不
法懼禍及因奏事北京白其狀帝不信興過南京復啓
於太子且曰乞他日無連坐至是帝歎曰朕待穗厚張
興常爲朕言不忍信今果然立命中官持敕諭穗歸悅

燔於蜀且召樛入朝樛至帝示以蜀王章伏地請死諸大臣廷劾樛曰周戮管蔡漢辟凜長皆大義滅親陛下縱念樛奈天下何帝曰樛朕弟朕且令諸兄弟議永樂十五年正月周王橚楚王楨蜀王椿等各上議樛違祖訓謀不軌蹤跡甚著大逆不道誅無赦帝曰諸王羣臣奉大義國法固爾吾寧生樛於是及二子皆廢爲庶人官屬多誅死興以先發不坐

韓憲王松太祖第二十子洪武二十四年封國開原性英敏通古今恭謹無過永樂五年薨以未之國命葬安德門外十年子恭王冲煊嗣時棄大寧三衛地開原逼

塞不可居二十二年改封平涼仁宗卽位召冲烱與弟襄陵王冲烱樂平王冲烱入朝各獻詩頌帝嘉悅賜金幣有差宣宗初請徙江南不許請蠲護衛屯租建邸第許之遣主事毛俊經度竝建襄陵樂平二邸及岷州廣福寺陝西守臣言歲歉請輟工帝令繕王宮罷建寺役平涼接邊徼間諜充斥冲烱習邊鄙利弊正統元年上書極言邊事賜書褒答五年薨子懷王範圯嗣九年薨弟靖王範埡嗣景泰元年薨子惠王徵針嗣初土木之變冲烱赴京師勤王會解嚴下書慰勞及成化六年寇入河套冲烱復請率子壻擊賊憲宗止之冲烱兄弟竝

急王事以藩禁嚴不用自是宗臣無預兵事者成化五年徵針薨子悼王偕流嗣十年薨弟康王偕潛嗣弘治十四年薨子昭王旭樞嗣性忠孝工詩居藩有惠政韓土瘠祿薄弟建寧王旭椿至以所受金冊質於宗室偕洸事聞廢爲庶人諸貧宗往往凌刼有司平涼知府吳世良鄭衍任守德王松先後被窘辱嘉靖十三年旭樞薨子定王融燧嗣懲宗室之橫頗繩以法不逞者怨之三十二年襄陵王融焚及諸宗二百餘人訐奏王奸利事勘無實革融焚等祿四十四年融燧薨子謨典先卒世宗末年以宗祿不足詔身不及王者許其嫡長子繼

王餘子如故秩謨典以世子不及王王其長子朗錡餘子止鎮國將軍萬曆三十四年朗錡薨諡曰端子孫皆早卒曾孫亶堦嗣崇禎十六年賊陷平涼被執襄陵王冲炆憲王第二子有至性母病刲股和藥病良已及卒終喪毀瘠每展墓必率子孫躬畚鍤培冢先後璽書褒美者六子範址服其教母荆罹危疾亦刲股進之愈其後五世同居門內雍肅嘉靖十一年賚以羊酒文幣韓諸王以襄陵家法爲第一王孫徵鑣病卒聘杜氏女未婚歸王家志操甚厲詔賜旌表

藩簡王模太祖第二十一子洪武二十四年封永樂六

年就藩潞州宣德六年薨子康王佾焯嗣景泰中數與
州官置酒大會巡撫朱鑑以聞帝令諸王非時令壽節
不得輒與有司讌飲著爲令天順元年薨子莊王幼墾
嗣正德十一年薨子恭王詮鉦嗣嘉靖六年薨孫允楨
攝府事九年卒無子再從弟憲王允移攝府事凡十年
乃嗣封當是時藩府諸郡王勛消詮鏞竝爭襲帝皆切
責之而令允移嗣二十八年薨子宣王恬熈嗣好學工
古文詞審聲律弟安慶王恬爌鎮康王恬焯穆宗時皆
以孝義旌萬曆十年恬熈薨子定王珪堯嗣仁孝恭慎
第六人封郡王者二餘例不得封朝廷獎王恭皆封郡

王而不與祿薨子效鏞嗣明亡國除沁水王珪堦簡王
七世孫也工詩喜士名譽藉甚前此有德平王允挺負
雋才與衡府新樂王載璽周宗人睦樗俊噤等齊名又
清源王幼圻康王第三子博學能文詞其後輔國將軍
勲漣從子允杉允杼允析及鎮國將軍恬焮與諸子珪
圻等竝以能詩名時稱藩藩多才焉

安惠王楹太祖第二十二子洪武二十四年封永樂六
年就藩平涼十五年薨無子封除府僚及樂戶悉罷留
典仗校尉百人守園洪熙初韓恭王改封平涼就安王
邸英宗令官校隸韓長史供安王祀暇日給韓王子襄

陵王冲炆使令景泰五年冲炆遂乞承安王祀正德十二年嗣襄陵王徵鈐請樂戶祀安王明年樂平王徵鉷援徵鈐例以請禮部言親王有樂戶郡王別城居者有事假鼓吹於有司其附親王國者假樂戶於長史司因竝革安王供祀樂戶嘉靖二年韓王旭樞復爲代請帝以安王故報可之徵鈐卒韓王融燧令長史革之徵鈐長孫旭橦上言禮樂自天子出韓王不宜擅予奪融燧亦言親王郡王禮樂宜有降殺帝曰樂戶爲安王祀也給如故

唐定王極太祖第二十三子洪武二十四年封永樂六

年就藩南陽十三年薨子靖王瓊煙嗣綜覈有矩矱爲
成祖所喜入朝五日三召見宣德元年薨妃高氏未冊
自經以殉詔封靖王妃無子弟憲王瓊烜嗣成化十一
年薨子莊王芝址嗣諸第三城王芝垝蕩陰王芝垞竝
好學有令譽而承休王芝垠憲王繼妃焦氏子也妃愛
之遇節旦召樂婦入宮芝址詰之語不遜焦妃怒持鐵
鎚擊宮門芝址閉不敢出芝垠與妃弟璟誣王詈繼母
按驗不實得芝垠慢母詈兄狀革爵久之始復二十一
年芝址薨子成王彌錡嗣弘治中疏言朝廷待親藩生
爵歿諡親親至矣間有惡未敗聞歿獲美諡是使善者

怠惡者肆也自今宜勘實用寓彰瘡禮臣請降敕獎諭
勉厲諸王詔可武宗喜遊幸彌鈺作憂國詩且上疏以
用賢圖治爲言弟文城王彌鈺有學行孝友篤至嘉靖
二年彌鈺薨無子彌鈺子敬王宇溫嗣二十一年獻金
助太廟工賜玉帶益祿二百石時承休王芝垠子彌鉞
以父與莊王交訐失令名折節蓋前愆宇溫上其事璽
書褒獎三十九年宇溫薨子順王宙祿嗣四十三年薨
子端王碩熿嗣惑於嬖人囚世子器盛及其子聿鍵於
承奉司器盛中毒死崇禎五年碩熿薨聿鍵嗣七年流
賊大熾蠲金築南陽城又援潞藩例乞增兵三千人不

許九年秋八月京師戒嚴倡義勤王詔切責勒還國事
定下部議廢爲庶人幽之鳳陽弟聿鏞嗣十四年李自
成陷南陽聿鏞遇害十七年京師陷福王由崧立於南
京乃赦聿鍵出

大清順治二年五月南都降聿鍵行至杭遇鎮江總兵
官鄭鴻逵戶部郎中蘇觀生遂奉入閩南安伯鄭芝龍
巡撫都御史張肯堂與禮部尚書黃道周等定議奉王
稱監國閏六月丁未遂立於福州號隆武改福州爲天
興府進芝龍鴻逵爲侯封鄭芝豹鄭彩爲伯觀生道周
俱大學士肯堂爲兵部尚書餘拜官有差聿鍵好學通

典故然權在鄭氏不能有所爲是年八月芝龍議簡戰守兵二十餘萬計餉不支其半請預借兩稅一年令羣下捐俸勸紳士輸助徵府縣銀穀未解者官吏督迫閭里騷然又廣開事例猶苦不足仙霞嶺守關兵僅數百人皆不堪用聿鍵屢促芝龍出兵輒以餉詘辭久之芝龍知衆論不平乃請以鴻逵出浙東彩出江西各擁兵數千號數萬旣行託候餉皆行百里而還先是黃道周知芝龍無意出師自請行從廣信趨婺源兵潰死事詳道周傳是時李自成兵敗走死通山其兄子李錦帥衆降於湖廣總督何騰蛟一時增兵十餘萬侍郎楊廷麟

祭酒劉同升起兵復吉安臨江於是廷麟等請聿鍵出江右騰蛟請出湖南原任知州金堡言騰蛟可恃芝龍不可恃宜棄閩就楚聿鍵大喜授堡給事中遣觀生先行募兵先是靖江王嘉亨僭稱監國不奉聿鍵命爲巡撫瞿式耜等所擒以捷聞而魯王以海又稱監國於紹興拒聿鍵使者故聿鍵決意出江西湖廣十二月發福州駐建寧廣東布政湯來賀運餉十萬由海道至明年二月駐延平三月

大清兵取吉安撫州圍楊廷麟於贛州尚書郭維經出閩募兵援贛六月

明史卷一百八 列傳 十
大兵克紹興魯王以海遁入海閩中大震芝龍假言海
寇至徹兵回安平鎮航海去守關將士皆隨之仙霞嶺
空無一人七月何騰蛟遣使迎聿鍵將至韶州唯時我
兵已抵閩關守浦城御史鄭爲虹給事中黃大鵬延平
知府王士和死焉八月聿鍵出走數日方至汀州

大兵奄至從官奔散與妃曾氏俱被執妃至九瀧投於
水聿鍵死於福州給事中熊緯尚書曹學佺通政使馬
思禮等自縊死

鄧靖王棟太祖第二十四子洪武二十四年封永樂六
年之藩安陸十二年薨無子封除留內外官校守園王

妃郭氏武定侯英女王薨踰月妃慟哭曰未亡人無子
尚誰恃引鏡寫容付宮人曰侯諸女長令識母遂自經
妃四女一夭其三女封光化穀城南漳郡主歲祿各八
百石宣德四年以郢故邸封梁王瞻埇移郢宮人居南
京

伊厲王欒太祖第二十五子洪武二十一年生生四年
封永樂六年之藩洛陽歲祿僅二千石王好武不樂居
宮中時時挾彈露劍馳逐郊外奔避不及者手擊之髡
裸男女以爲笑樂十二年薨禮臣請追削封爵不許二
十二年子簡王顥映始得嗣縱中官擾民洛陽人苦之

河南知府李驥稍持以法誣奏驥被逮治已而得白罪
王左右英宗時上表文不恭屢被譴讓天順六年薨世
孫悼王諱釁嗣成化十一年薨弟定王諱鋡嗣好學崇
禮居喪哀毀歲時祀先致齋於外郡王諸將軍中尉非
慶賀不褻見民間高年者禮下之正德三年薨子莊王
訐淵嗣嘉靖五年薨弟敬王訐淳嗣居母喪以孝聞以
祿薄上言先朝以河南課鈔萬七千七百貫准祿米八
千石八年革諸王請乞租稅伊府課鈔亦在革中乞補
祿戶部言課鈔本成弘間請乞非永樂時欽賜比河南
一省缺祿者八十餘萬宜不許帝從部議二十一年薨

世子典模嗣貪而愎多持官吏短長不如指必構之去
旣去復折辱之御史行部過北邙山外模要笞之縉紳
往來率紆途取他境經郭外者府中人輒追挽其車置
其不朝入朝者復辱以非禮府牆壞請更築乃奪取民
舍以廣其宮郎中陳大壯與邸鄰索其居不與使數十
人從大壯卧起奪其飲食竟至餓死所爲宮崇臺連城
擬帝闕有錦衣官校之陝者經洛陽典模忽召官屬迎
詔鼓吹擁錦衣入捧一黃卷入宮衆請開讀曰密詔也
遂趣錦衣去錦衣謂王厚待之不知所以其夜大張樂
至曙府中皆呼千歲詐謂天子特親我也閉河南府城

大選民間子女七百餘留其姝麗者九十人不中選者
令以金贖都御史張永明御史林潤給事中邱岳相繼
言其罪狀再遣使往勘革祿三之二令壞所僭造宮城
歸民間女執羣小付有司典模不奉詔部牒促之布政
使持牒入見模曰牒何爲者可用障櫺耳四十三年二
月撫按官以聞詔禮部會三法司議僉謂典模淫暴無
藩臣禮陛下曲赦再四終不湔改奸回日甚宜如徽王
載堦故事禁錮高牆削除世封詔從其議與子褒熈俱
安置開封

皇子楠太祖第二十六子洪武二十六年生踰月薨

靖江王守謙太祖從孫父文正南昌王子也當太祖起兵時南昌王前死妻王氏攜文正依太祖太祖高后撫如己子比長涉獵傳記饒勇畧隨渡江取集慶路已有功授樞密院同僉太祖從容問若欲何官文正對曰叔父成大業何患不富貴爵賞先私親何以服衆太祖喜其言益愛之太祖爲吳王命爲大都督節制中外諸軍事及再定江西以洪都重鎮屏翰西南非骨肉重臣莫能守乃命文正統元帥趙得勝等鎮其地儒士郭之章劉仲服爲叅謀文正增城浚池招集山寨未附者號令明肅遠近震懾居無何友諒帥舟師六十萬圍洪都文

正數摧其鋒堅守八十有五日程壞復完者數十丈友諒旁掠吉安臨江俘其守將徇城下不爲動太祖親帥兵來援友諒乃解去與太祖相拒於彭蠡友諒掠糧都昌文正遣方亮焚其舟糧道絕友諒遂敗復遣何文輝等討平未附州縣江西之平文正功居多太祖還京告廟飲至賜常遇春廖永忠及諸將士金帛甚厚念文正前言知大體錫功尚有待也而文正不能無少望性素卞急至是暴怒遂失常度任椽吏衛可達奪部中子女按察使李飲氷奏其驕侈缺望太祖遣使詰責文正懼飲氷益言其有異志太祖卽日登舟至城下遣人名之

文正倉卒出迎太祖數曰汝何爲者遂載與俱歸欲竟其事高后力解之曰兒特性剛耳無他也免官安置桐城未幾卒飲水亦以他事伏誅文正之被謫也守謙甫四歲太祖撫其頂曰兒無恐爾父倍訓教貽我憂我終不以爾父故廢爾育之宮中守謙幼名鐵柱吳元年以諸子命名告廟更名煒洪武三年更名守謙封靖江王祿視郡王官屬親王之半命耆儒趙壘爲長史傅之旣長之藩桂林桂林有元順帝潛邸改爲王宮上表謝太祖敕其從臣曰從孫幼而遠鎮西南其善導之守謙知書而好比羣小粵人怨咨召還戒諭之守謙作詩怨望

帝怒廢爲庶人居鳳陽七年復其爵徙鎮雲南使其妃弟徐溥同往賜書戒飭語極摯切守謙暴橫如故名還使再居鳳陽復以強取牧馬錮之京師二十五年卒子贊儀幼命爲世子三十年春遣省晉燕周楚齊蜀湘代肅遼慶谷秦十三王自湘楚入蜀歷陝西抵河南山西北平東至大寧遼陽還自山東使知親親之義熟山川險易習勞苦贊儀恭慎好學永樂元年復之國桂林使蕭用道爲長史用道善輔導贊儀亦敬禮之六年薨諡曰悼僖子莊簡王佐敬嗣初給銀印宣德中改用金塗正統初與其弟奉國將軍佐敏相訐奏語連大學士楊

榮帝怒成其使人成化五年薨子相承先卒孫昭和王規裕嗣弘治二年薨子端懿王約麒嗣以孝謹聞正德十一年薨子安肅王經扶嗣好學有儉德嘗爲敬義箴嘉靖四年薨子恭惠王邦寧嗣與巡按御史徐南金相訐奏奪祿米罪其官校隆慶六年薨子康僖王任昌嗣萬曆十年薨子溫裕王履燾嗣二十年薨無子從父憲定王任晟嗣三十八年薨子榮穆王履祜嗣薨子亨嘉嗣李自成陷京師後自稱監國於廣西爲巡撫瞿式耜所誅時唐王聿鍵在福建奏捷焉

興宗五子后常氏生虞懷王雄英吳王允熲呂后生惠

明史卷一百一十五
列傳 五
帝衡王允熲徐王允熯

虞懷王雄英興宗長子太祖嫡長孫也洪武十五年五月薨年八歲追加封諡

吳王允熲興宗第三子建文元年封國杭州未之藩成祖卽位降爲廣澤王居漳州未幾召還京廢爲庶人錮鳳陽永樂十五年卒

衡王允熲興宗第四子建文元年封成祖降爲懷恩王居建昌與允熲俱召還錮鳳陽先後卒

徐王允熯興宗第五子建文元年封成祖降爲敷惠王隨母呂太后居懿文陵永樂二年下詔改甌寧王奉太

子祀四年十二月邸中火暴薨諡曰哀簡

惠帝二子俱馬后生

太子文奎建文元年立爲皇太子燕師入七歲矣莫知所終

少子文圭年二歲成祖入幽之中都廣安宮號爲建庶人英宗復辟憐庶人無罪久繫欲釋之左右或以爲不可帝曰有天命者任自爲之大學士李賢贊曰此堯舜之心也遂請於太后命內臣牛玉往出之聽居鳳陽婚娶出入使自便與閹者二十人婢妾十餘人給使令文圭孩提被幽至是年五十七矣未幾卒

成祖四子仁宗漢王高煦趙王高燧俱文皇后生高熾
未詳所生母

漢王高煦成祖第二子性凶悍洪武時召諸王子學於
京師高煦不肯學言動輕佻爲太祖所惡及太祖崩成
祖遣仁宗及高煦入臨京師舅徐輝祖以其無賴密戒
之不聽盜輝祖善馬徑渡江馳歸途中輒殺民吏至涿
州又擊殺驛丞於是朝臣舉以責燕成祖起兵仁宗居
守高煦從嘗爲軍鋒白溝河之戰成祖幾爲瞿能所及
高煦帥精騎數千直前決戰斬能父子於陣及成祖東
昌之敗張玉戰死成祖隻身走適高煦引師至擊退南

軍徐輝祖敗燕兵於浦子口高煦引蕃騎來成祖大喜
曰吾力疲矣兒當鼓勇再戰高煦麾蕃騎力戰南軍遂
却成祖屢瀕於危而轉敗爲功者高煦力爲多成祖以
爲類己高煦亦以此自負恃功驕恣多不法成祖卽位
命將兵往開平備邊時議建儲淇國公邱福駙馬王寧
善高煦時時稱高煦功高幾奪嫡成祖卒以元子仁賢
且太祖所立而高煦又多過失不果永樂二年仁宗立
爲太子封高煦漢王國雲南高煦曰我何罪斥萬里不
肯行從成祖巡北京力請竝其子歸南京成祖不得已
聽之請得天策衛爲護衛輒以唐太宗自比己復乘間

請益兩護衛所爲益忒成祖嘗命同仁宗謁孝陵仁宗體肥重且足疾兩中使掖之行恒失足高煦從後言曰前人蹉跌後人知警時宣宗爲皇太孫在後應聲曰更有後人知警也高煦回顧失色高煦長七尺餘輕趨善騎射兩腋若龍鱗者數片旣負其雄武又每從北征在成祖左右時媒孽東宮事譖解縉至死黃淮等皆繫獄十三年五月改封青州又不欲行成祖始疑之賜敕曰旣受藩封豈可常居京邸前以雲南遠憚行今封青州又託故欲留侍前後殆非實意茲命更不可辭然高煦遷延自如私選各衛健士又募兵三千人不隸籍兵部

縱使劫掠兵馬指揮徐野驢擒治之高煦怒手鐵爪撾殺野驢衆莫敢言遂僭用乘輿器物成祖聞之怒十四年十月還南京盡得其不法數十事切責之褫冠服囚繫西華門內將廢爲庶人仁宗涕泣力救乃削兩護衛誅其左右狎暱諸人明年三月徙封樂安州趣卽日行高煦至樂安怨望異謀益急仁宗數以書戒不悛成祖北征晏駕高煦子瞻圻在北京覘朝廷事馳報一晝夜六七行高煦亦日遣人潛伺京師幸有變仁宗知之顧益厚遇遺書召至增歲祿賜賚萬計仍命歸藩封其長子爲世子餘皆郡王先是瞻圻怨父殺其母屢發父過

惡成祖曰爾父子何忍也至是高煦入朝悉上瞻圻前後覘報中朝事仁宗召示瞻圻曰汝處父子兄弟間讒構至此穉子不足誅遣守鳳陽皇陵未幾仁宗崩宣宗自南京奔喪高煦謀伏兵邀於路倉卒不果及帝卽位賜高煦及趙王視他府特厚高煦日有請竝陳利國安民四事帝命有司施行仍復書謝之因語羣臣曰皇祖嘗諭皇考謂叔有異志宜備之然皇考待之極厚如今所言果出於誠則是舊心已革可不順從凡有求請皆曲徇其意高煦益自肆宣德元年八月遂反遣其親信枚青等潛至京師約舊功臣爲內應英國公張輔執之

以聞時高煦已約山東都指揮靳榮等又散弓刀旂幟
於衛所盡奪傍郡縣畜馬立五軍指揮王斌領前軍韋
達左軍千戶盛堅右軍知州朱恒後軍諸子各監一軍
高煦自將中軍世子瞻坦居守指揮韋弘韋興千戶王
玉李智領四哨部署已定僞授王斌朱恒等太師都督
尚書等官御史李濬以父喪家居高煦招之不從變姓
名間道詣京師上變帝猶不忍加兵遣中官侯泰賜高
煦書泰至高煦盛兵見泰南面坐大言曰永樂中信讒
削我護衛從我樂安仁宗徒以金帛餌我我豈能鬱鬱
居此汝歸報急縛奸臣夏原吉等來徐議我所欲泰懼

唯唯而已比還帝問漢王何言治兵何如泰皆不敢以實對是月高煦遣百戶陳剛進疏更爲書與公侯大臣多所指斥帝歎曰漢王果反乃議遣陽武侯薛祿將兵往討大學士楊榮等勸帝親征帝是之張輔奏曰高煦素懦願假臣兵二萬擒獻闕下帝曰卿誠足擒賊顧朕初卽位小人或懷二心不親行不足安反側於是車駕發京師過楊村馬上顧從臣曰度高煦計安出或對曰必先取濟南爲巢窟或對曰彼曩不肯離南京今必引兵南下帝曰不然濟南雖近未易攻聞大軍至亦不暇攻護衛軍家樂安必內顧不肯徑趨南京高煦外誇詐

內實怯臨事狐疑不能斷今敢反者輕朕年少新立衆心未附不能親征耳今聞朕行已膽落敢出戰乎至卽擒矣高煦初聞祿等將兵攘臂大喜以爲易與及聞親征始懼時有從樂安來歸者帝厚賞之令還諭其衆仍遺書高煦曰張敖失國始於貫高淮南被誅成於伍被今六師壓境王卽出倡謀者朕與王除過恩禮如初不然一戰成擒或以王爲奇貨縛以來獻悔無及矣前鋒至樂安高煦約詰旦出戰帝令大軍蓐食兼行駐蹕樂安城北壁其四門賊乘城守王師發神機銃箭聲震如雷諸將請卽攻城帝不許再敕諭高煦皆不答城中人

多欲執獻高煦者高煦大懼乃密遣人詣行幄願假今夕訣妻子卽出歸罪帝許之是夜高煦盡焚兵器及通逆謀書明日帝移蹕樂安城南高煦將出城王斌等力止曰寧一戰死無爲人擒高煦給斌等復入宮遂潛從間道出見帝羣臣請正典刑不允以劾章示之高煦頓首言臣罪萬萬死惟陛下命帝令高煦爲書召諸子餘黨悉就擒赦城中罪脇從者不問命薛祿及尚書張本鎮撫樂安改曰武定州遂班師廢高煦父子爲庶人築室西安門內錮之王斌等皆伏誅惟長史李默以嘗諫免死謫口北爲民天津青州滄州山西諸都督指揮約

舉城應者事覺相繼誅凡六百四十餘人其故縱與藏匿坐死戍邊者一千五百餘人編邊氓者七百二十人帝製東征記以示羣臣高煦及諸子相繼皆死

趙簡王高燧成祖第三子永樂二年封尋命居北京詔有司政務皆啟王後行歲時朝京師辭歸太子輒送之江東驛高燧恃寵多行不法又與漢王高煦謀奪嫡時時譖太子於是太子宫寮多得罪七年帝聞其不法事大怒誅其長史顧晟褫高燧冠服以太子力解得免擇國子司業趙亨道董子莊爲長史輔導之高燧稍改行二十一年五月帝不豫護衛指揮孟賢等結欽天監官

王射成及內侍楊慶養子造僞詔謀進毒於帝俟晏駕詔從中下廢太子立趙王總旂王瑜姻家高以正者爲賢等畫謀謀定告瑜瑜上變帝曰豈應有此立捕賢得爲僞詔賢等皆伏誅陞瑜遼海衛千戶帝顧高燧曰爾爲之耶高燧大懼不能言太子力爲之解曰此下人所爲高燧必不與知自是益斂戢仁宗卽位加漢趙二王歲祿二萬石明年之國彰德辭常山左右二護衛宣宗卽位賜田園八十頃帝擒高煦歸至單橋尚書陳山迎駕言曰趙王與高煦共謀逆久矣宜移兵彰德擒趙王否則趙王反側不自安異日復勞聖慮帝未決時惟楊

士奇以爲不可山復邀尚書蹇義夏原吉共請帝曰先帝友愛二叔甚漢王自絕於天朕不敢赦趙王反形未著朕不忍負先帝也及高煦至京亦言嘗遣人與趙通謀戶部主事李儀請削其護衛尚書張本亦以爲言帝不聽旣而言者益衆明年帝以其詞及羣臣章遣駙馬都尉廣平侯袁容持示高燧高燧大懼乃請還常山中護衛及羣牧所儀衛司官校帝命收其所還護衛而與儀衛司宣德六年薨子惠王瞻塙嗣景泰五年薨子悼王祈鑑嗣天順四年薨子靖王見濤嗣惠王悼王皆頗有過失至見濤惡尤甚屢賊殺人又嘗乘醉欲殺其叔

父成化十二年事聞詔奪祿米三之二去冠服戴民巾讀書習禮其後二年見潯母妃李氏爲之請得冠服如故見潯卒不能改愛幼子祐枳遂誣長子祐栳以大逆復被詔誚讓弘治十五年薨子莊王祐栳嗣正德十三年薨子康王厚煜嗣事祖母楊妃以孝聞嘉靖七年六月璽書褒予明年冬境內大饑厚煜上疏請辭祿一千石以佐振帝嘉王憂國詔有司發粟不允所辭及帝南巡厚煜遠出迎命益祿三百石厚煜性和厚構一樓名思訓嘗獨居讀書文藻瞻麗宗人輔國將軍祐栳等數犯法與有司爲難厚煜庇祐栳祐栳卒得罪竝見責讓

其後有司益務以事裁抑諸宗洛川王翊鎰奴與通判田時雨之隸爭瓜而毆時雨捕王奴厚煜請解不得竟論奴充軍未幾宗室數十人索祿時雨以宗室毆府官自於上官知府傅汝礪盡捕各府人厚煜由是忿恚竟自縊死三十九年十月也厚煜子成皋王載垸疏聞於朝下法司按問時雨斬河南市汝礪戍極邊厚煜子載培及載培子翊鎰皆前卒翊鎰子穆王常清嗣以善行見旌萬曆四十二年薨世子由松前卒弟壽光王由桂子慈懌嗣薨無子穆王弟常洵嗣崇禎十七年彰德陷被執

明史卷一百十八終

明史卷一百十九

列傳第七

總裁官總事務經筵講官少保兼太子太保保和殿大學士兼管吏部部尚書事加六級張廷玉等奉

敕修

諸王四

仁宗諸子

鄭王瞻埈

廬江王載堙

越王瞻墉

蘄王瞻垠

襄王瞻埈

棗陽王祐棖

荊王瞻垌

淮王瞻璈

滕王瞻埈

梁王瞻垌

衛王瞻埈

英宗諸子

德王見潏

許王見淳

秀王見澍

崇王見澤

吉王見浚

忻王見治

徽王見沛

景帝子

懷獻太子見濟

憲宗諸子

悼恭太子祐極

岐王祐楡

益王祐楨

衡王祐揮

新樂王載璽

雍王祐標

壽王祐楷

汝王祐棖

涇王祐楫

榮王祐樞

申王祐楷

孝宗子

蔚王厚燁

仁宗十子昭皇后生宣宗越王瞻墉襄王瞻璿李賢妃
生鄭王瞻埈蘄王瞻垠淮王瞻埈張順妃生荆王瞻埈
郭貴妃生滕王瞻埈梁王瞻垠衛王瞻埈

鄭靖王瞻埈仁宗第二子永樂二十二年九月封仁宗
崩皇后命與襄王監國以待宣宗宣德元年帝征樂安

仍命與襄王居守四年就藩鳳翔正統八年詔遷懷慶
留京邸明年之國瞻浚暴厲數斃人杖下英宗以御史
周瑛爲長史稍戢成化二年薨子簡王祁鏐嗣祁鏐之
爲世子也襄王朝京師經新鄉祁鏐不請命遣長史往
迎英宗聞之不悅賜書責讓及嗣王多不法又待世子
寡恩長史江萬程諫被責辱萬程以聞帝遣英國公張
懋太監王允中齎敕往諭始上書謝罪弘治八年薨世
子見滋母韓妃不爲祁鏐所禮見滋悒悒先卒子康王
祐杓嗣正德二年薨無子從弟懿王祐檠嗣十六年薨
子恭王厚烷嗣世宗幸承天厚烷迎謁於新鄉加祿三

百石疏奏母閤太妃貞孝事蹟詔付史館其後帝修齋
醮諸王爭遣使進香厚煖獨不遣嘉靖二十七年七月
上書請帝修德講學進居敬窮理克已存誠四箴演連
珠十章以神仙土木爲規諫語切直帝怒下其使者於
獄詔曰前宗室有謗訕者置不治茲復效尤王今之西
伯也欲爲爲之後二年而有祐樁之事厚煖遂獲罪初
祁鏌有子十人世子見滋次孟津王見滋次東垣王見
湏見滋母有寵於祁鏌規奪嫡不得竊世子金冊以去
祁鏌索之急因怨不復朝所爲益不法祁鏌言之憲宗
革爲庶人及康王薨無子見滋子祐樁應及以前罪廢

乃立東垣王子祐釋至是祐檮求復郡王爵怨厚烷不爲奏乘帝怒撫厚烷四十罪以叛逆告詔駙馬中官卽訊還報反無驗治宮室名號擬乘輿則有之帝怒曰厚烷訕朕躬在國驕傲無禮大不道削爵錮之鳳陽隆慶元年復王爵增祿四百石厚烷自少至老布衣蔬食世子載堉篤學有至性痛父非罪見繫築土室宮門外席藁獨處者十九年厚烷還邸始入宮萬曆十九年厚烷薨載堉曰鄭宗之序盟津爲長前王見蒞旣錫謚復爵矣爵宜歸盟津後累疏懇辭禮臣言載堉雖深執讓節然嗣鄭王已三世無中更理宜以載堉子翊錫嗣載堉

執奏如初乃以祐樁之孫載璽嗣而令載堉及翊錫以世子世孫祿終其身子孫仍封東垣王二十二年正月載堉上疏請宗室皆得儒服就試母論中外職中式者視才品器使詔允行明年又上曆算歲差之法及所著樂律書考辨詳確識者稱之卒諡端清崇禎中載璽子翊鍾以罪賜死國除廬江王載堉簡王元孫也崇禎十七年二月賊陷懷慶載堉整冠服端坐堂上賊至被執欲屈之厲聲曰吾天朝藩王肯降汝逆賊耶詬罵不屈遇害賊執其長子翊樞擁之北行三月過定興於旅店作絕命詞遂不食死

明史卷二百六 列傳 四
越靖王瞻墉仁宗第三子永樂二十二年封衢州未之
藩宣宗賜以昌平莊田正統四年薨妃吳氏殉諡貞惠
無後

蘄獻王瞻垠仁宗第四子初封靜樂王永樂十九年薨
諡莊獻仁宗卽位追加封諡無後

襄獻王瞻埈仁宗第五子永樂二十二年封莊敬有令
譽宣德四年就藩長沙正統元年徙襄陽英宗北狩諸
王中瞻埈最長且賢衆望頗屬太后命取襄國金符入
宮不果召瞻埈上書請立皇長子令邸王監國募勇智
士迎車駕書至景帝立數日矣英宗還京師居南內又

上書景帝宜旦夕省膳問安率羣臣朔望見無忘恭順
英宗復辟石亨等誣于謙王文有迎立外藩語帝頗疑
瞻塏久之從宮中得瞻塏所上二書而襄國金符固在
太后閣中乃賜書召瞻塏比二書於金滕入朝宴便殿
避席請曰臣過汴汴父老遮道言按察使王槩賢以誣
逮詔獄願皇上加察帝立出槩命爲大理卿詔設襄陽
護衛命有司爲王營壽藏及歸帝親送至午門外握手
泣別瞻塏逡巡再拜帝曰叔父欲何言頓首曰萬方望
治如饑渴願省刑薄斂帝拱謝曰敬受教目送出端門
乃還四年復入朝命百官朝王於邸詔王詣昌平謁三

陵及辭歸禮送加隆且敕王歲時與諸子得出城遊獵蓋異數也六年又召以老辭歲時存問禮遇之隆諸藩所未有成化十四年薨子定王祁鏞嗣弘治元年薨子簡王見淑嗣三年薨子懷王祐材嗣好鷹犬蓄善馬往返南陽八百里日猶未晡妃父井海誘使殺人孝宗戒諭戍海及其左右祐材好道術賜予無節又嘗與興邸爭地連逮七十餘家獄久不決大理卿汪綸兩解之乃得已十七年薨弟康王祐楨嗣亦好道術嘉靖二十九年薨無子從子莊王厚頌由陽山王嗣定王曾孫也時王邸災先世蓄積一空厚頌折節爲恭儉節祿以餉邊

進金助三殿工兩賜書幣事嫡母王太妃及生母潘太妃以孝聞潘卒殯之東偏王太妃曰汝母有子社稷是賴無以我故避正寢厚頌泣曰臣不敢以非禮加臣母及葬跣足扶襯五十里士大夫過襄者皆爲韋布交四十五年薨子靖王載堯嗣萬曆二十三年薨子翊銘嗣崇禎十四年張獻忠陷襄陽遇害初大學士楊嗣昌之視師也以襄陽爲軍府增堞浚隍貯五省餉金及弓刀火器是年二月獻忠邀殺嗣昌使於道奪其符驗以數十騎紿入襄城夜半火作遲明賊大至執翊銘南城樓屬卮酒曰王無罪王死嗣昌得以死償王遂殺王及貴

陽王常法火城樓焚其屍賊去僅拾顱骨數寸妃妾輩死者四十三人福清王常澄進賢王常淦走免事聞帝震悼命所司備喪禮諡曰忠王嗣昌朝惠王於荊州謁者謝之曰先生惠顧寡人願先之襄陽謂襄城之破罪在嗣昌也十七年以常澄嗣襄王寄居九江後徙汀州不知所終棗陽王祐楸憲王曾孫也材武善文章博涉星曆醫卜之書嘉靖初上書請考興獻帝世宗以其議發自宗人足厭服羣心褒之更請除宗人祿使以四民業自爲生賢者用射策應科第寢不行時襄王祐檣病廢不事事承奉邵亨挾權自恣至捶死鎮寧王舅祐楸

誘致之挾其目帝遣大理少卿袁宗儒偕中官錦衣往
訊亨論死祐樵坐奪爵帝幸承天念祐樵前疏復之
荆憲王瞻堦仁宗第六子永樂二十二年封宣德四年
就藩建昌宮中有巨蛇蜿蜒自梁垂地或凭王座瞻堦
大懼請徙正統十年徙蘄州景泰二 years 上書請朝上皇
不許四年薨子靖王祁鎬嗣天順五年薨子見瀟嗣靖
王三子長見瀟次都梁王見溥樊山王見潒見瀟與見
溥同母怨母之睚見溥也錮母奪其衣食竟死出柩於
竇召見溥入後園箠殺之給其妃何氏入宮逼淫之從
弟都昌王見潭妻茆氏美求通焉見潭母馬氏防之嚴

見瀟髡馬氏鞭之囊土壓見潭死械繫茆妃入宮嘗集惡少年輕騎微服涉漢水掠人妻女見潒懼其及也密聞於孝宗召至京帝御文華門命廷臣會鞠見瀟引伏廢爲庶人錮西內居二年見瀟從西內撫奏見潒罪誣其與楚府永安王謀不軌帝遣使往按問不實見潒更奏見瀟嘗私造弓弩與子祐柄有異謀驗之實賜見瀟死廢祐柄而以見溥子祐櫛嗣爲荆王時弘治七年也十七年薨諡曰和子端王厚烜嗣性謙和銳意典籍嘉靖中病辭祿不允令富順王厚焜攝朝謁厚焜和王第二子與弟永新王厚熜以能詩善畫名厚烜子永定王

載盛長厚焜卽謝攝事人尤以爲賢嘉靖三十二年厚
焜薨載盛已前卒其子恭王翊鉅嗣荆自靖王諸子交
惡失令譽及厚焜兄弟感先世家難以禮讓訓飭宗人
見潁曾孫載垲尤折節恭謹以文行稱郡王女例請祿
於朝載垲四女皆妻士人不請封嘗上應詔正禮二疏
不報讀易窮理著大隱山人集子翊鉅鋋翊鏐翊鑒皆工
詩兄弟嘗共處一樓號花萼社翊鉅表載垲賢以訓諸
子諸子不率教世子常洽尤殘恣翊鉅言於朝革爲庶
人隆慶四年翊鉅薨次子常信嗣萬曆四年薨無子弟
康王常盎由安城王嗣萬曆二十五年薨子定王由樊

嗣天啓二年薨子慈翼嗣崇禎時流賊革裏眼左金王
詭降於楚帥慈翼欲與爲好召宴盛陳女樂十六年正
月張獻忠陷蘄州慈翼先一月薨賊圍王宮盡掠其所
見妓樂去

淮靖王瞻塿仁宗第七子永樂二十二年封宣德四年
就藩韶州英宗卽位之十月以韶多瘴癘正統元年徙
饒州正統十一年薨子康王祁銓嗣弘治十五年薨世
子見濂早卒無子從子定王祐棨嗣游戲無度左右倚
勢暴橫境內苦之長史莊典以輔導失職自免詔不許
推官汪文盛數持王府事有顧嵩者病狂持刀斧入王

門官校執詰之謬言出汪指使典白之守臣鎮守太監
黎安嘗以事至饒從騎入端禮門被撻銜祐棨甚先是
祐棨有名琴曰天風環珮寧王宸濠求之不得又求濱
湖地不與至是嗾安奏祐棨過失及文盛被誣事詔下
撫按訊安與宸濠謀不待報遽繫典及府中官校鞠之
典辭倨宸濠錐之斃獄中他所連坐甚衆於是祐棨奏
安挾仇殺典庇嵩帝遣都御史金獻民太監張欽往按
治祐棨畏宸濠不能自明欽等復言祐棨信奸徒爲暴
請嚴戒之軍校坐戍者二十餘人典寃竟不白嘉靖三
年祐棨薨無子弟莊王祐楩嗣十六年薨子憲王厚燾

嗣四十二年薨子恭王載堉嗣萬曆五年薨弟順王載
堅嗣二十三年薨子翊鉞嗣翊鉞之未王也與妓王愛
狎冒妾額入宮且令撫庶子常洪爲子陳妃與世子常
清俱失愛潛謀易嫡御史陳王道以理論王出之外舍
常洪遂與宗人翊鉏等謀夜入王宮盜冊寶資貨以出
守臣上其事王愛論死勒常洪自盡翊鉏等削屬籍永
錮奪翊鉞四歲祿久之薨子常清嗣國亡不知所終
滕懷王瞻埜仁宗第八子永樂二十二年封雲南未之
國洪熙元年薨無後

梁莊王瞻埈仁宗第九子永樂二十二年封宣德初詔

鄭越襄荊淮五王歲給鈔五萬貫惟梁倍之四年就藩
安陸故郢邸也襄王瞻塏自長沙徙襄陽道安陸與瞻
塏留連不忍去瀕別瞻塏慟曰兄弟不復更相見奈何
左右皆泣下正統元年言府卑濕乞更爽塏地帝詔郢
中歲歉俟有秋理之竟不果六年薨無子封除梁故得
郢田宅園湖後皆賜襄王及睿宗封安陸盡得郢梁邸
田供二王祠祀

衛恭王瞻塏仁宗第十子永樂二十二年封懷慶幼善
病宣宗撫愛之未就藩歲時謁陵皆命攝祀孝謹好學
以賢聞正統三年薨妃楊氏殉賜諡貞烈無子封除

明史卷一百九 列傳 一
英宗九子周太后生憲宗崇王見澤萬宸妃生德王見
潸及皇子見湜吉王見浚忻王見治王惠妃生許王見
淳高淑妃生秀王見澍韋德妃生徽王見沛

德莊王見潸英宗第二子初名見清景泰三年封榮王
天順元年三月復東宮同日封德秀崇吉四王歲祿各
萬石初國德州改濟南成化三年就藩請得齊漢二庶
人所遺東昌兗州閒田及白雲景陽廣平三湖地憲宗
悉予之復請業南旺湖以漕渠故不許又請漢庶人舊
牧馬地知府趙璜言地歸民間供稅賦已久不宜奪帝
從之正德初詔王府莊田畝徵銀三分歲爲常見潸奏

初年兗州莊田歲畝二十升獨清河一縣成化中用少卿宋旻議歲畝五升若如新詔臣將無以自給戶部執山東水旱相仍百姓凋敝宜如詔帝曰王何患貧其勿許十二年薨子懿王祐榕嗣嘉靖中戶部議覈王府所請山場湖陂斷自宣德以後者皆還官詔允行於是山東巡撫都御史邵錫奏德府莊田俱在革中與祐榕相訐奏錫持之益急儀衛司軍額千七百人逃絕者以餘丁補錫謂非制檄濟南知府楊撫籍諸補充者勿與餉軍校大譁毀府門詔逮問長史楊穀楊孟法戍儀衛副薛寧及軍校陶榮諭王守侯度毋徇羣小滋多事議者

明史卷二百九 列傳 十一
謂錫故激致其罪不盡祐榕過云此十一年八月事至
十八年涇徽二王復請得所革莊田祐榕援以爲請詔
仍與三湖地使自徵其課其年薨孫恭王載塏嗣萬曆
二年薨子定王翊鎰嗣十六年薨子常濟嗣崇禎五年
薨世子由樞嗣十二年正月

大清兵克濟南見執

見湜英宗第三子早卒復辟後不復追贈

許悼王見淳英宗第四子景泰三年封明年薨禮臣請
用親王禮葬帝以王幼殺其制

秀懷王見澍英宗第五子生於南宮天順元年封成化

六年就藩汝寧長史劉誠獻千秋日鑒錄見澍朝夕誦之就藩時慮途中擾民令併日行王居隘左右請遷文廟廣之見澍不聽曰居近學宮時聞絃頌聲顧不美乎論書至西伯戡黎長史誠主吳氏說曰戡黎者武王也右長史趙銳主孔氏說曰實文王事爭之失色見澍曰經義未有定論不嫌往復今若此非先皇帝簡二先生意也成化八年薨無子封除

崇簡王見澤英宗第六子生於南宮天順元年封成化十年就藩汝寧故秀邸也弘治八年七月皇太后春秋高思一見王帝特敕召之禮部尚書倪岳言數年來三

王之國道路供億民力殫竭今召王復來往返勞費兼水溢旱蝗舟車所經恐有他虞親王入朝雖有故事自宣德來已鮮舉行英宗復辟襄王奉詔來朝雖篤敦叙之恩實塞疑讒之隙非故事也大學士徐溥亦以爲言帝重違太后意不允旣而言官交章及之乃已十八年薨子靖王祐檣嗣正德六年薨子恭王厚燿嗣三王並有賢名而靖王尤孝友嘉靖十六年厚燿薨子莊王載境嗣三十六年薨子端王翊鐸嗣萬曆三十八年薨孫由櫜嗣崇禎十五年閏十一月李自成陷汝寧執由櫜去僞封襄陽伯令諭降州縣之未下者由櫜不從殺之

於泌陽城弟河陽王由材世子慈輝等皆遇害

吉簡王見浚英宗第七子生於南宮天順元年封時甫
二歲成化十三年就藩長沙刻先聖圖及尚書於嶽麓
書院以授學者嘉靖六年薨孫定王厚焜嗣請湘潭商
稅益邸租不許十八年薨子端王載均由光化王嗣四
十年薨子莊王翊鎮嗣隆慶四年薨無子庶兄宣王翊
鑾由龍陽王嗣萬曆四十六年薨孫由棟嗣崇禎九年
薨子慈燿嗣十六年張獻忠入湖南同惠王走衡州隨
入粵國亡後死於緬甸

忻穆王見治英宗第八子成化二年封未就藩八年薨

無後

徽莊王見沛英宗第九子成化二年封十七年就藩鈞州承奉司自置吏左布政使徐恪革之見沛以聞憲宗書諭王置吏非制也恪無罪正德元年薨子簡王祐檣嗣嘉靖四年薨子恭王厚燭嗣二十九年薨子浦城王載堦嗣初厚燭好琴斲琴者與知州陳吉交惡厚燭庇之劾吉逮詔獄都御史駱昂御史王三聘白吉寃帝怒并逮之昂杖死三聘吉俱戍邊議者不直厚燭時方士陶仲文有寵於世宗厚燭厚結之仲文具言王忠敬奉道帝喜封厚燭太清輔元宣化真人予金印及載堦嗣

王益以奉道自媚於帝命綰其父真人印南陽人梁高輔自言能導引服食載埜用其術和藥命高輔因仲文以進帝封高輔通妙散人載埜清微翊教輔化忠孝真人載埜遂益恣壞民屋作臺榭苑囿庫官王章諫杖殺之嘗微服之揚州鳳陽爲邏者所獲羈留三月走歸時高輔被上寵不復親載埜載埜銜之已而爲帝取藥不得求載埜舊所蓄者載埜不與而與仲文高輔大恨乘間言載埜私往南中與他過失帝疑之奪真人印仲文知覺已成不復敢言三十五年有民耿安者奏載埜奪其女下按治有司因發其諸不法事獄成降爲庶人錮

明史卷三百九 列傳 十四
高牆時載堦居宮中所司防守嚴獄詞不得聞及帝遣
內臣同撫按至始大懼登樓望龍亭後有紅板輿歎曰
吾不能自明徒生奚爲遂自縊死妃沈氏次妃林氏爭
取帛自縊子安陽王翊錡萬善王翊鈐并革爵及未封
子女皆遷開封聽周王約束國除

景皇帝一子

懷獻太子見濟母杭妃始爲邸王世子英宗北狩皇太
后命立憲宗爲皇太子而以邸王監國及邸王卽位心
欲以見濟代太子而難於發皇后汪氏又力以爲不可
遲回久之太監王誠舒良爲帝謀先賜大學士陳循高

穀百金侍郎江淵王一寧蕭鑑學士商輅半之用以緘其口然猶未發也會廣西土官都指揮使黃玠以私怨戕其弟思明知府琯滅其家所司聞於朝玠懼罪急遣千戶袁洪走京師上疏勸帝早與親信大臣密定大計易建東宮以一中外之心絕覬覦之望疏入景帝大喜亟下廷臣會議且令釋玠罪進階都督時景泰三年四月也疏下之明日禮部尚書胡濙侍郎薩琦鄒幹集文武羣臣廷議衆相顧莫敢發言惟都給事中李侃林聰御史朱英以爲不可吏部尚書王直亦有難色司禮太監興安厲聲曰此事不可已卽以爲不可者勿署名無

持兩端羣臣皆唯唯署議於是濙等暨魏國公徐承宗
寧陽侯陳懋安遠侯柳溥石清侯石亨成安侯郭晟定
西侯蔣琬駙馬都尉薛桓襄城伯李瑾武進伯朱瑛平
鄉伯陳輔安鄉伯張寧都督孫鏜張軌楊俊都督同知
田禮范廣過興衛穎都督僉事張輓劉深張通郭瑛劉
鑑張義錦衣衛指揮同知畢旺曹敬指揮僉事林福吏
部尚書王直戶部尚書文淵閣大學士陳循工部尚書
東閣大學士高穀吏部尚書何文淵戶部尚書金濂兵
部尚書于謙刑部尚書俞士悅左都御史王文王翱楊
善吏部侍郎江淵俞山項文耀戶部侍郎劉中敷沈翼

蕭鎡禮部侍郎王一寧兵部侍郎李賢刑部侍郎周瑄
工部侍郎趙榮張敏通政使李錫通政欒憚王復參議
馮貫諸寺卿蕭維禎許彬蔣守約齊整李賓少卿張固
習嘉言李宗周蔚能陳誠黃士儁張翔齊政寺丞李茂
李希安柴望酈鏞楊詢王溢翰林學士商輅六科都給
事中李讚李侃李春蘇霖林聰張文質十三道御史王
震朱英涂謙丁泰亨強弘劉琚陸厚原傑嚴樞沈義楊
宜王驥左鼎上言陛下膺天明命中興邦家統緒之傳
宜歸聖子黃琮奏是制曰可禮部具儀擇日以聞卽日
簡置東宮官公孤詹事僚屬悉備五月廢汪后立杭妃

爲皇后更封太子爲沂王立見濟爲太子詔曰天佑下
民作之君實遺安於四海父有天下傳之子斯本固於
萬年大赦天下令百官朔望朝太子賜諸親王公主邊
鎮文武內外羣臣又加賜陳循高穀江淵王一寧蕭鎡
商輅各黃金五十兩四年二月乙未太子冠十一月以
御史張鵬言簡東宮師傅講讀官越四日太子薨諡曰
懷獻葬西山天順元年降稱懷獻世子諸建議易儲者
皆得罪

憲宗十四子萬貴妃生皇第一子栢賢妃生悼恭太子
祐極紀太后生孝宗邵太后生興獻帝祐杭岐王祐榆

雍王祐檮張德妃生益王祐檣衡王祐輝汝王祐棖姚
安妃生壽王祐楫楊恭妃生涇王祐檣申王祐楫潘端
妃生榮王祐樞王敬妃生皇第十子第一子第十子皆
未名殤

悼恭太子祐極憲宗次子成化七年立爲皇太子薨
岐惠王祐楄憲宗第五子成化二十三年與益衡雍三
王同日封弘治八年之藩德安十四年薨無子封除
益端王祐楄憲宗第六子弘治八年之藩建昌故荊邸
也性儉約巾服澣至再日一素食好書史愛民重士無
所侵擾嘉靖十八年薨子莊王厚煜嗣性朴素外物無

所嗜三十五年薨無子弟恭王厚炫嗣自奉益儉辭祿
二千石萬曆五年薨孫宣王翊釗嗣嗜結客厚炫所積
府藏悉斥以招賓從通聘問於諸藩不數年頓盡三十
一年薨子敬王常漣嗣四十三年薨子由本嗣國亡竄
閩中

衡恭王祐樞憲宗第七子弘治十二年之藩青州嘉靖
十七年薨子莊王厚燾嗣嘗辭祿五千石以贍宗室宗
人德之隆慶六年薨子康王載圭嗣萬曆七年薨無子
弟安王載封嗣十四年薨子定王翊鏐嗣二十年薨子
常漣嗣新樂王載璽恭王孫也博雅善文辭索諸藩所

纂述得數十種梓而行之又撰洪武聖政頌皇明政要
諸書多可傳者從父高唐王厚煥齊東王厚炳皆以博
學篤行聞嘉靖中賜敕獎諭者再

雍靖王祐檮憲宗第八子初封保寧弘治十二年之藩
衡州地卑濕宮殿朽敗不可居邸中數有異乞移山東
東平州廷臣以擇地別建勞民傷財四川叙州有申王
故府宜徙居之詔可旣而以道遠不可徙正德二年地
裂宮室壞王薨無子封除

壽定王祐檮憲宗第九子弘治四年與汝涇榮申四王
同日封十一年就藩保寧正德元年以岐王世絕改就

岐邸於德安校尉橫撓市民知府李重抑之奏逮重安
陸民劉鵬隨重詣大理對簿重未之識也訝之鵬曰太
守仁爲民受過民皆得効死豈待識乎重卒得白祐楮
聞而悔之後以賢聞嘉靖二十四年薨無子除封

汝安王祐梈憲宗第十一子弘治十四年之藩衛輝正
德十五年請預支食鹽十年爲婚費詔別給長蘆鹽二
千引食鹽如故世宗南巡迓於途甚恭加祿五百石錫
金幣嘉靖二十年薨無子封除

涇簡王祐樞憲宗第十二子弘治十五年之藩沂州嘉
靖十六年薨子厚烜未封而卒無子封除

榮莊王祐樞憲宗第十三子正德初尚留京邸乞霸州
信安鎮田故牧地也部臣言永樂中設立草場蕃育馬
匹以資武備至成化中近倖始陳乞爲莊後岐壽二府
相沿莫之改正暨孝宗皇帝留神戎務清理還屯不以
私廢公也今榮王就國有期所請宜勿與三年之藩常
德祐樞狀貌類高帝居國稍驕縱世宗詔以沅江西港
天心團坪河泊稅入王邸嘉靖十八年薨孫恭王載堉
嗣萬曆二十三年薨子翊鈐嗣四十年薨子常滾嗣薨
子憲王由枏嗣薨子慈炤嗣張獻忠入湖南奉母妃姚
氏走辰溪不知所終

明史卷一百十九
列傳 九
申懿王祐楷憲宗第十四子封叙州未就藩弘治十六年薨無子封除

孝宗二子武宗蔚王厚煒俱張皇后生

蔚悼王厚煒孝宗次子生三歲薨追加封諡

明史卷一百十九終

明史卷一百二十

列傳第八

總裁官總理事務經筵講官少保兼太子太保保和殿大學士兼管吏部戶部尚書事加級張廷玉等奉
敕修

諸王五

世宗諸子

哀冲太子載基

莊敬太子載壑

景王載圳

穎王載塿

戚王載堊

薊王載壘

均王載颯

穆宗諸子

甲辰卷一百二十一
外傳 一
憲懷太子翊鉞

靖王翊鈴

潞王翊鏐

神宗諸子

邠王常淑

福王常洵

沅王常治

瑞王常浩

惠王常潤

桂王常瀛

光宗諸子

簡王由樞

齊王由楫

懷王由模

湘王由栩

惠王由棣

熹宗諸子

懷冲太子慈然

悼懷太子慈焞

獻懷太子慈炁

莊烈帝諸子

太子慈烺

懷王慈烜

定王慈炯

永王慈炤

悼靈王慈煥

悼懷王

世宗八子閭貴妃生哀冲太子載基王貴妃生莊敬太
子載壑杜太后生穆宗盧靖妃生景王載圳江肅妃生
潁王載壘趙懿妃生戚王載壘陳雍妃生薊王載壘趙

明史卷一百三
列傳二
榮妃生均王載坫

哀冲太子載基世宗第一子生二月而殤

莊敬太子載壑世宗第二子嘉靖八年世宗將南巡立爲皇太子甫四歲命監國以大學士夏言爲傳尚書霍韜郎中鄒守益獻東宮聖學圖冊疑爲謗訕幾獲罪帝旣得方士段朝用思習修攝術諭禮部具皇太子監國儀太僕卿楊最諫杖死監國之議亦罷贊善羅洪先趙時春唐順之請太子出閣講學文華殿皆削籍太廟成命太子攝祀二十八年三月行冠禮越二日薨帝命與哀冲太子竝建寢園歲時祭祀從諸陵後

景恭王載圳世宗第四子嘉靖十八年冊立太子同日
封穆宗裕王載圳景王其後太子薨廷臣言裕王次當
立帝以前太子不永遲之晚信方士語二王皆不得見
載圳旣與裕王竝出邸居處衣服無別載圳年少左右
懷窺覬語漸聞中外頗有異論四十年之國德安居四
年薨帝謂大學士徐階曰此子素謀奪嫡今死矣初載
圳之藩多請莊田部議給之荊州沙市不在請中中使
責市租知府徐學謨執不與又取薪稅於漢陽之劉家
壩推官吳宗周持之皆獲譴其他土田湖陂侵入者數
萬頃王無子歸葬西山妃妾皆還居京邸封除

明史卷一百一十一 列傳三
潁殤王載堉世宗第五子生未踰月殤

戚懷王載堉世宗第六子

薊哀王載壘世宗第七子

均思王載珮世宗第八子三王俱未踰歲殤追加封諡
穆宗四子李皇后生憲懷太子翊鉞孝定太后生神宗
潞王翊鏐其靖王翊鈴母氏無考

憲懷太子翊鉞穆宗長子生五歲殤贈裕世子隆慶元
年追諡

靖悼王翊鈴穆宗第二子生未踰年殤贈藍田王隆慶
元年追加封諡

潞簡王翊鏐穆宗第四子隆慶二年生生四歲而封萬曆十七年之藩衛輝初翊鏐以帝母弟居京邸王店王莊徧畿內比之藩悉以還官遂以內臣司之皇店皇莊自此益侈翊鏐居藩多請贍田食鹽無不應者其後福藩遂緣爲故事明初親王歲祿外量給草場牧地間有以廢壤河灘請者多不及千頃部臣得執奏不盡從也景王就藩時賜予槩裁省楚地曠多閒田詔悉予之景藩除潞得景故籍田多至四萬頃部臣無以難至福王常洵之國版籍更定民力益絀尺寸皆奪之民間海內騷然論者推原事始頗以翊鏐爲口實云翊鏐好文性

勤飭恒以歲入輸之朝助工助邊無所惜帝益善之四十二年皇太后哀問至翊鏐悲慟廢寢食未幾薨世子常滂幼母妃李氏理藩事時福王奏請輒取中旨帝於王妃奏亦從中下示無異同部臣言王妃奏陳四事如軍校月糧之當給發義和店之預防侵奪義所當許至歲祿之欲先給王莊之欲更設則不當許且於王無絲豪益徒令邸中人日魚肉小民飽私囊將來本支千億請索日頻盡天府之版章給王邸而不足也不報四十六年常滂嗣崇禎中流賊擾秦晉河北常滂疏告急言衛輝城卑土惡請選護衛三千人助守捐歲入萬金資

餉不煩司農朝廷嘉之盜發王妃塚常滂上言賊延蔓漸及江北鳳泗陵寢可虞宜早行勦滅時諸藩中能急國難者惟周潞二王云後賊躪中州常滂流寓於杭順治二年六月降於我

大清

神宗八子王太后生光宗鄭貴妃生福王常洵沅王常治周端妃生瑞王常浩李貴妃生惠王常潤桂王常瀛其邠王常淑永思王常溥母氏無考
邠哀王常淑神宗第二子生一歲殤

福恭王常洵神宗第三子初王皇后無子王妃生長子

是爲光宗常洵次之母鄭貴妃最幸帝久不立太子中外疑貴妃謀立己子交章言其事竄謫相踵而言者不止帝深厭苦之二十九年始立光宗爲太子而封常洵福王婚費至三十萬營洛陽邸第至二十八萬十倍常制廷臣請王之藩者數十百奏不報至四十二年始令就藩先是海內全盛帝所遣稅使礦使遍天下月有進奉明珠異寶文毳錦綺山積他搜括羸美億萬計至是多以資常洵臨行出宮門召還數四期以三歲一入朝下詔賜莊田四萬頃所司力爭常洵亦奏辭得減半中州腴土不足取山東湖廣田益之又奏乞故大學士張

居正所沒產及江都至太平沿江荻洲雜稅竝四川鹽井權茶銀以自益伴讀承奉諸官假履畝爲名乘傳出入河南北齊楚間所至騷動又請淮鹽千三百引設店洛陽與民市中使至淮揚支鹽乾沒要求輒數倍而中州舊食河東鹽以改食淮鹽故禁非王肆所出不得鬻河東引遏不行邊餉由此絀廷臣請改給王鹽於河東且無與民市弗聽帝深居久羣臣章奏率不省獨福藩使通籍中左門一日數請朝上夕報可四方姦人亡命探風旨走利如驚如是者終萬曆之世及崇禎時常洵地近屬尊朝廷尊禮之常洵日閉閣飲醇酒所好惟婦

女倡樂秦中流賊起河南大旱蝗人相食民間藉藉謂
先帝耗天下以肥王洛陽富於大內援兵過洛者喧言
王府金錢百萬而令吾輩枵腹死賊手南京兵部尚書
呂維祺方家居聞之懼以利害告常洵不爲意十三年
冬李自成連陷永寧宜陽明年正月參政王蔭昌帥衆
警備總兵官王紹禹副將劉見義羅泰各引兵至常洵
召三將入賜宴加禮越數日賊大至攻城常洵出千金
募勇士縋而出用矛入賊營賊稍却夜半紹禹親軍從
城上呼賊相笑語揮刀殺守堞者燒城樓開北門納賊
常洵縋城出匿迎恩寺翌日賊跡而執之遂遇害兩承

奉伏尸哭賊摔之去承奉呼曰王死某不願生乞一棺收王骨齏粉無所恨賊義而許之桐棺一寸載以斷車兩人卽其旁自縊死王妃鄒氏及世子由崧走懷慶賊火王宮三日不絕事聞帝震悼輟朝三日令河南有司改殯十六年秋七月由崧襲封帝親擇宮中寶玉帶賜之明年三月京師失守由崧與潞王常澐俱避賊至淮安四月鳳陽總督馬士英等迎由崧入南京庚寅稱監國以兵部尚書史可法戶部尚書高弘圖及士英俱爲大學士士英仍督鳳陽軍務壬寅自立於南京僞號弘光史可法督師江北召士英入分淮揚鳳廬爲四鎮以

總兵官黃得功劉良佐劉澤清高傑領之由崧性闇弱
湛於酒色聲伎委任士英及士英黨阮大鍼擢至兵部
尚書巡閱江防二人日以鬻官爵報私憾爲事事詳諸
臣傳中未幾有王之明者詐稱莊烈帝太子下之獄又
有婦童氏自稱由崧妃亦下獄於是中外譁然明年三
月南寧侯左良玉舉兵武昌以救太子誅士英爲名順
流東下阮大鍼黃得功等帥師禦之而我

大清兵以是年五月己丑渡江辛卯夜由崧走太平蓋
趨得功軍也壬辰士英挾由崧母妃奔杭州癸巳由崧
至蕪湖丙申

大兵至南京城北文武官出降丙午執由崧至南京九月甲寅以歸京師

沅懷王常治神宗第四子生一歲殤

瑞王常浩神宗第五子初太子未立有三王竝封之旨蓋謂光宗福王及常浩也尋以羣臣爭遂寢二十九年東宮立與福惠桂三王同日封常洵以長先之藩常浩年已二十有五尚未選婚羣臣交章言率不報而日索部帑爲婚費贏十八萬藏宮中且言冠服不能備天啓七年之藩漢中崇禎時流寇劇封地當賊衝七年上書言臣託先帝骨肉獲奉西藩未幾年而寇至比西賊再

渡河關入漢興破洵陽逼興安紫陽平利白河相繼陷沒督臣洪承疇單騎裹甲出入萬山賊始敗遁臣捐犒軍振飢銀七千餘兩此時撫臣練國事移兵商洛按臣范復粹馳赴漢中近境稍寧旣而鳳縣再陷蜀賊入秦州楚賊上興安六月遂犯郡界幸諸將憑江力拒賊方稍退臣在萬山絕谷中賊四面至覆亡無日臣肺腑至親藩封最僻而於寇盜至迫惟陛下哀憐常浩在宮中衣服禮秩降等好佛不近女色及寇逼秦中將吏不能救乞師於蜀總兵官侯良桂援之遂奔重慶隴西士大夫多挈家以從十七年張獻忠陷重慶被執遇害時天

無雲而雷者三從死者甚衆

惠王常潤神宗第六子福王之藩內廷蓄積爲空中官
藉諸王冠婚索部帑以實宮中所需輒數十萬珠寶稱
是戶部不能給常潤與弟常瀛年二十皆未選婚其後
兵事亟始減殺成禮天啓七年之藩荊州崇禎十五年
十二月李自成再破彝陵荊門常潤走湘潭自成入荊
州據之常潤之渡湘也遇風於陵陽磯宮人多漂沒身
僅以免就吉王於長沙十六年八月張獻忠陷長沙常
潤走衡州就桂王衡州繼陷與吉王桂王走永州巡按
御史劉熙祚遣人護三王入廣西以身當賊永州陷熙

祚死之

桂端王常瀛神宗第七子天啓七年之藩衡州崇禎十六年衡州陷與吉惠二王同走廣西居梧州

大清順治二年

大兵平江南福王就擒在籍尚書陳子壯等將奉常瀛監國會唐王自立於福建遂寢是年薨於蒼梧世子已先卒次子安仁王由櫬亦未幾卒次由榔崇禎時封永明王三年八月

大兵取汀州執唐王聿鍵於是兩廣總督丁魁楚廣西巡撫瞿式耜巡按王化澄與舊臣呂大器等共推由榔

監國母妃王氏曰吾兒不勝此願更擇可者楚魁等意益堅合謀迎於梧十月十四日監國肇慶以魁楚大器式耜爲大學士餘授官有差是月

大兵取贛州內侍王坤倉卒奉由榔仍走梧州式耜等力爭乃回肇慶十一月唐王弟聿錫自閩浮海至粵時閩舊臣蘇觀生撤兵奔廣州與布政使顧元鏡總兵官林察等謀立聿錫僞號紹武與由榔相拒是月由榔亦自立於肇慶僞號永曆遣兵部侍郎林佳鼎討聿錫會大兵由福建取廣州執聿錫觀生自縊祭酒梁朝鍾太僕卿霍子衡等俱死肇慶大震王坤復奉由榔走梧州

明史紀事本末卷一百一十一 列傳
明年二月由平樂潯州走桂林魁楚棄由榔走岑溪降
於

大軍旣而平樂不守由榔大恐會武岡總兵官劉承允
以兵至全州王坤請赴之式耜力諫不聽乃以式耜及
總兵官焦璉留守桂林封陳邦傳爲思恩侯守昭平遂
趨承允軍中三月封承允安國公錦衣指揮馬吉翔等
爲伯承允挾由榔歸武岡改曰奉天府政事皆決焉是
時長沙衡永皆不守湖廣總督何騰蛟與侍郎嚴起恒
走白牙市六月由榔遣官召騰蛟至密使除承允顧承
允勢盛騰蛟復還白牙

大兵由寶慶趨武岡馬吉翔等挾由榔走靖州承允舉城降由榔又奔柳州道出古泥總兵官侯性太監龐天壽帥舟師來迎會天雨飢餓性供帳甚備九月土舍覃鳴珂作亂大掠城中矢及由榔舟先是

大兵趨桂林焦璉拒守甚力又廣州有警

大兵東向桂林稍安旣而湖南十三鎮將郝永忠盧鼎等俱奔赴桂林騰蛟亦至與式耜議分地給諸將使各自爲守璉已先復陽朔平樂陳邦傳復潯州合兵復梧州廣西全省略定十二月由榔返桂林五年二月

大兵至靈川郝永忠潰於興安奔還挾由榔走柳州

明史卷一百一十一 列傳二十一
大兵攻桂林式耜騰蛟拒戰時南昌金聲桓等叛降於
由榔八月由榔至肇慶六年春

大兵下湘潭何騰蛟死明年由榔走梧州是年十二月
大兵入桂林瞿式耜及總督張同儻死焉由榔聞報大
懼自梧州奔南寧時孫可望已據滇黔受封爲秦王八
年三月遣兵來衛殺嚴起恒等九年二月可望迎由榔
入安隆所改曰安龍府久之日益窮促聞李定國與可
望有隙遣使密召定國以兵來迎馬吉翔黨於可望偵
知之大學士吳貞毓以下十餘人皆被殺事詳貞毓傳
後二年李定國敗於新會將由安隆入滇可望患之促

由榔移貴陽就己由榔故遲行定國至遂奉由榔由安南衛走雲南居可望署中封定國晉王可望以妻子在滇未敢動明年由榔送其妻子還黔遂舉兵與定國戰於三岔可望將白文選單騎奔定國軍可望敗挈妻子赴長沙

大軍前降十五年三月

大兵三路入雲南定國阮雞公背斷貴州道別將守七星關抵生界立營以牽蜀師

大兵出遵義由水西取烏撒守將棄關走李定國連敗於安隆由榔走永昌明年正月三日

大兵入雲南由榔走騰越定國敗於潞江又走南甸二十六日抵囊木河是爲緬境緬勒從官盡棄兵仗始啓關至蠻莫二月緬以四舟來迎從官自覓舟隨行者六百四十餘人陸行者自故岷王子而下九百餘人期會於緬甸十八日至井亘黔國公沐天波等謀奉由榔走戶獵二河不果五月四日緬復以舟來迎明日發井亘行三日至阿瓦阿瓦者緬酋所居城也又五日至赭磴陸行者緬人悉掠爲奴多自殺惟岷王子八十餘人流入暹羅緬人於赭磴置草屋居由榔遣兵防之十七年定國文選與緬戰索其主連敗緬兵緬終不肯出由榔

十八年五月緬酋弟莽猛白代立給從官渡河盟旣至以兵圍之殺沐天波馬吉翔王維恭魏豹等四十有二

人詳任國璽傳存者由榔與其屬二十五人十二月大兵臨緬白文選自木邦降定國走景線緬人以由榔父子送

軍前明年四月死於雲南六月李定國卒其子嗣興等降

永思王常溥神宗第八子生二歲殤

光宗七子王太后生熹宗簡王由櫟王選侍生齊王由楫李選侍生懷王由模劉太后生莊烈皇帝定懿妃生

湘王由栩敬妃生惠王由楷

簡懷王由櫟光宗第二子生四歲殤

齊思王由楫光宗第三子生八歲殤

懷惠王由模光宗第四子生五歲殤

湘懷王由栩光宗第六子

惠昭王由楷光宗第七子俱早殤五王皆追加封諡

熹宗三子懷冲太子慈然不詳其所生母皇貴妃范氏
生悼懷太子慈煇容妃任氏生獻懷太子慈炅

懷冲太子慈然熹宗第一子

悼懷太子慈煇熹宗第二子

獻懷太子慈炁熹宗第三子與懷冲悼懷皆殤

莊烈帝七子周皇后生太子慈烺懷隱王慈烜定王慈烜田貴妃生永王慈炤悼靈王慈煥悼懷王及皇七子太子慈烺莊烈帝第一子崇禎二年二月生九月立爲皇太子十年預擇東宮侍班講讀官命禮部尚書姜逢元詹事姚明恭少詹王鐸屈可伸侍班禮部侍郎方逢年諭德項煜修撰劉理順編修吳偉業楊廷麟林曾志講讀編修胡守恒楊士聰校書十一年二月太子出閣十五年正月開講閣臣條上講儀七月改慈慶宮爲端本宮慈慶懿安皇后所居也時太子年十四議明歲選

明史卷一百一十五 列傳 十四
婚故先爲置宮而移懿安后於仁壽殿旣而以寇警暫
停京師陷賊獲太子僞封宋王及賊敗西走太子不知
所終由崧時有自北來稱太子者驗之以爲駙馬都尉
王昺孫王之明者僞爲之繫獄中南京士民譁然不平
袁繼咸及劉良佐黃得功輩皆上疏爭左良玉起兵亦
以救太子爲名一時眞僞莫能知也由崧旣奔太平南
京亂兵擁王之明立之越五日降於我

大清

懷隱王慈烜莊烈帝第二子殤

定王慈烜莊烈帝第三子崇禎十四年六月諭禮臣朕

第三子年已十齡敬遵祖制宜加王號但旣受冊封必具冕服而會典開載年十二或十五始行冠禮十齡受封加冠二禮可竝行乎於是禮臣歷考經傳及本朝典故以奏定於是歲冊封越二年行冠禮九月封爲定王十一月選新進士爲檢討國子助教等官爲待詔充王講讀官以兩殿中書充侍書十七年京師陷不知所終永王慈炤莊烈帝第四子崇禎十五年三月封永王賊陷京師不知所終

悼靈王慈煥莊烈帝第五子生五歲而病帝視之忽云九蓮菩薩言帝待外戚薄將盡殤諸子遂薨九蓮菩薩

明史卷二百一十五 列傳 三
者神宗母孝定李太后也太后好佛宮中像作九蓮座
故云帝念王靈異封爲孺孝悼靈王元機慈應真君命
禮臣議孝和皇太后莊妃懿妃道號禮科給事中李焜
言諸后妃祀奉先殿不可崇邪教以亂徽稱不聽十六
年十二月改封宣顯慈應悼靈王去真君號

悼懷王莊烈帝第六子生二歲殤第七子生三歲殤名
俱無考

贊曰有明諸藩分封而不錫土列爵而不臨民食祿而
不治事蓋矯枉鑒覆所以杜漢晉末大之禍意固善矣
然徒擁虛名坐縻厚祿賢才不克自見知勇無所設施

防閑過峻法制日增出城省墓請而後許二王不得相
見藩禁嚴密一至於此當太祖時宗藩備邊軍戎受制
贊儀疎屬且令遍歷各國使通親親然則法網之繁起
自中葉豈太祖衆建屏藩初計哉

明史卷一百二十終